


BWENZEJI



Mu matùku àkafwà mfùmù Uziyà ngàkamòna kàbìdì Mukalenge musòmbè pa nkwasa wa butùmbi, mutùmbùke...mubàndishùibwe, nè bizemba byà mùzàbì wèndè bìrwa byùjè ntempèlù tètè.

Kumutù kwendè kùwa kwimàne baselefimà: yónsò ùwa nè mapwápwà àsambòmbò; nè àbìdì ùwa mubwikìle kwísù, nènku nè àbìdì ùwa mubwikìle makàsà, nènku nè àbìdì ùwa ùbùùka naawù.

Nè umwe ùrwa wèla mukwèndè lubilà, wàmba nè: Wa cijila, wa cijila, wa cijila, m'Mukalenge Nzambi wa bilwilu: buloba bujimà mbûle tètè nè butùmbi bwèndè.

Nè makunji à ciibi àvwa ànyunga ku dîyî dyà uvwa
wela lubilà awu, nè nzùbu wàkuula tètè nè mwîshî.

Pashìishe mèmè kwamba nè: Dyàkabi dyànyì! bwalu ncyena mwakane to; bwalu ndi muntu wa mishikù mibùpe, nè ndi musòmbèle munkaci mwà bantu bàà mishikù mibùpe, bwalu mèsù àànyì mmamòne Mfùmù, MUKALENGE wa bilwilu.

Ke umwe wa ku baselëfimà kubùùkayè kulwa kùndì, mwikàlè nè dikàlà dyà mudilu mu cyanza cyèndè, òwàwàye mwangàte nè lukwàtù pa cyoshelu:

Ke kudintwayè ku mishikù yànyì, nè kwambayè nè: Mòna, eci cyàlengì mishikù yèbè;... bubì bwèbè bùmùshùbù, nè mpèkaatù webè wàkezùdùbù.

*Ngákuumvwa kàbìdì dīyì dyà Mukalenge, dyàmba
nè: Nganyì ùngààtùmà, nè nganyì wàya kaaba kèètù?
Pashùshe mèmè kwamba nè: Mmèmè ewu; ntùmaaku.*

² Twìnyikààyi mitù yètù mpindyewu.

3 Taatù, “dyàkabi,” tudi tudyùmvwa mùshindù wùm>wùm>wùm>wè wàkadyùmvwà Yeshàayi awu nè: “Dyàkabi dyètù! Bwalu mèsù ètù mmamòne Mfùmù, Mukalenge wa Butùmbi.” Tudi tuKusakidila, Mukalenge, bwà mùdiku njila wa dikezula, dilòòlò edi, udi kàyi mwà kulenga ànu mishikù yètù nkààyaayi tò kàdi myoyi yètù nè misùukà yètù, nè kutùkezula ku bukooya bwètù bwònsò. Bwalu bìdì nè, mu bulelèlè, tudi

basòmbèle munkaci mwà bantu bàà mishikù mibiùpe, nè mishikù yètù, kàbìdì, mmikooyike. Tudi tulòmba bwà Nyumà Mwímpè munène awu àlwekù àlengè mishikù yètù nè myoyi yètù nè dilaabiibwa, Kapyà kàà Nyumà Mwímpè káfumina ku cyoshelu cyà Nzambi, nè kàtùkezùlèku ku bupidyà bwètù bwónsò nè mpatà, bwà Wàbwelakù nè wàvwija cisòmbedi Cyèndè munkaci mwètù. Bwalu, tudi baMunangè, nè tudi tuMukuukwila, nè tudi tuMukuukwila. Tudi tulòmba, Taatù, dilòlò edi, kwòkò muntu kaaba aka udi kàyì mwanjì kupeta dilengiibwa dyà dikezudiibwa dyà kùdì Nyumà Mwímpè munène awu to, Kapyà kàà Nzambi, bwà nè dilòlò edi mudimu ewu newènjiibwè munda mwàbò bwà bwalu bwà Bukalenge bwà Nzambi. Tudi tulòmba nùnkù mu Dìná dyà Yesù. Amen.

Nudi mwà kusòmbaayi.

⁴ Mpindyewu ndi...nènteetè bwà kupàtuka kumpàlà kwà dībà. Ncyèna muswè bwà nùpangilè kàlaasà kàà Dyàlumingu to. Mpindyewu, kakwenà bwalu to wèwè mupùmbisha mudimu ditùkù dimwè, kabyàkutàmba kukutàcisha to kàdì; mwwa munùlamè too nè pa dībà citèemà nè tusunsa makùmi àsàtù, anyi cintu bu nànkù, dilòlò adi. Kàdì kanùpùmbishi kàlaasà kà Dyàlumingu to, nànsha cyùdì wenza ciikàle cinyi.

Mpindyewu cyena-bwalu cyànyì dilòlò edi cidi nè: *Bwenzeji*.

⁵ Twètù baswè kubala bwalu-bulonda ebu, bìvwa bìkèngela twètù kubuulula mu Kulondolola Mwibìdì, nshapità wa 26, nènku nudi mwà kucibala. Uziyà ewu ùvwa mwànà wa balume mulami wa mikòòkò. Nè yèyè, Kulondolola Mwibìdì 26 ùdì ùtwàmbila, nè ùvwa mwediibwe maanyì bu mfùmù muciiikàle nè bidimu dikùmi nè bisambòmbò. Nènku tatwèndè wa Uziyà, muntu wa difwànà dyà Nzambi. Nènku muntu ewu ùvwa muntu mwímpè, mwikàle nè baledi bàà difwànà dyà Nzambi: “Wàkenza cìvwà cijaalàme ku mèsù kwà Mukalenge.” Mpindyewu tudi tusangana nè pa ciibidilu... .

⁶ Ndi—ndi ngèèla meeji leelù ewu nè, lutàtù lwètù lunène, lwà citùdì twela meeji nè buntòmbòjì bwà bânà, m’buntòmbòjì bwà baledi, buntòmbòjì bwà mu dikù. Cisàmbà cyètù—cyètù ncyumùke ku bintu bìvwàci—bìvwàci nè cyà kushààla naabi. Èkèleeziyà mmushààle cìvùmvù anyi mukwàte mashika, nè bà—bânà mbabwelè mu byà pa buloba.

⁷ Mpindyewu Hollywood ùdì ùpàtula filmè yàbùngì nè—nè ntèlèviziyò, nè bikwàbò, byà bwalu abi kabiyi nànsha bikenkèciibwe to, mwaba wùdìbo bèèla mulawu nè—nè—nè bàtèèla Dìná dyà Nzambi citèèlàtèèlà. Nènku—nènku kale wàwa bìvwa bibi bwà bânà bàà mu èkèleeziyà yà cijila bwà kuya ku—ku—ku sèndemà yà tulòndò anyi sèndemà, kàdì mpindyewu Sàtaanà ùvwa mutùpike yèyè kumpàlà, pa kubibweja buludi mu nzùbu, mu mmwènekèlu wa ntèlèviziyò, nè pashiishe kabiyi

bikenketa to, nè—nè bikwàbò. Nènku ke mùshindù wùdì Sàtaanà ùbwela ku kakesè ku kakesè.

⁸ Mwàkadì dinàya dyà bàpulumuka mu lubùwà kale wàwa. Bàbúngì bàà kunùdì kí mbadivùlùke to, bwalu nudi bàná batekète. Pa ciibidilu cìvwa dinàya dyà bàná; nusòmba pa mpulumuku nè nubanga kupulumuka nunyùnguluka, ànu kunyùnguluka. Kùvwa disòsù, cibila, nènku muntu yònsò ùvwa mufwànyine kwela mukwèndè kadyòmbò, bwà nè nganyì uvwa mwà kutàmba kuseemena pabwìpì naadi. Nènku paanyimà pàà katanci, kumpàlà kwà wèwè kucimanya, [Mwanèètù Branham ùdì ùtuuta cishòndò—Muf.] ki wèwè wàpwèkì wàyi awu.

⁹ Ke mùshindù wùdì mpèèkaatù awu. Kunàyikù nendè to. Kùtàngidi mùdì mwà kuseemena nendè pabwìpì to. Mòna mùshindù wùdì mwà kushààla kule nendè. Nwamònu anyi? Kanùnàyikù nè kapyà to. Wèwè muswè kunàya nè kapyà... Mémè ncyèna muswè kùnàyakù nè kapyà to.

¹⁰ Mununu kampànda wa cyena Ecosse, musangu kampànda, mwàkambàbo, ùvwa nè cyà kuya dyàmwàmwa dyà mukùnà kampànda. Nè matempu àvwa mindile, muntu yònsò ùvwa muswè kumwambula kuya nendè dyàmwàmwa. Yèyè nè: “Ndi muswè mwendeshi mutàmbe bwìmpè bwà kungambulayè.”

¹¹ Ki umwe wa ku bôbò kwambayè nè: “Èè, ndi mwà kunyemesha tùbalù twànyì tùsambòmbò mu lùbilu lukolè nshiya ntàntà wa—wa byàlà díkùmi nè mwelelu wà mukùnà awu.” Kukùluka, ndufù. Yèyè nè: “Ndi mwendeshi mwìmpè bwà kwendesha tùbalù twànyì, mu dikùbiibwa, mwab’awu, mu ntàntà wa byàlà díkùmi nè nkàtà yànyì, nè nciyì mwà kukùluka to.”

¹² Mukwàbò pèndè kwambayè nè: “Mémè ndi mwà kutàmba aci. Ndi mwà kwendeshila mu ntàntà wa byàlà bìsambòmbò, anyì mu ntàntà wa byàlà binaayi, kàdi nciyì mwà kukùlukakù to.”

Yèyè nè: “Kàdi bìshi bwèbè wèwè, mukalenge?”

¹³ Yèyè nè: “Èè, ncyèna mumanyè to. Ncitu muswè kwenza nàнку to. Ndi—ndi ànu nkàtà ku mubàngubangu aku.”

Yèyè nè: “Wèwè ngambùleku.” Ncyà bushùwà. Ke yèyè awu.

¹⁴ Kí mmùshindù wùdì mwà kuseemena pabwìpì to, nè mùshindù wùdì wela meeji nè udi mukolèshìibwe bilenga byà bìshi, shààla wèwè ànu kule menemene nè mpèkaatù nè mwèbè mwònsò mùdì mwà kushààla amu. Ndà wèwè ànu kule menemene nè mwèbè mwònsò. Wèwè udi wamba nè: “Èè, mémè’s ndi mwà kwenza *cikampànda*. Kakwèna bwalu bubi mu kwenza kwà *nàнку* to.” Èè, kwòkò mpatà mu meeji èbè, kucyénjiku to nànsha kakesè. Mwaba kanà wònsò wùdì mpatà, shààla kule naawù. Dìbà adi, nudi numòna’s, dìbà adi kakùyì mpatà to wèwè udi nè mwoyi ku diitabuujà, pìikalàku kakùyì mpatà to. Kòkò

kwikàle mpatà, dībà adi cilekèle, kùseemenyi naaci pabwìpì nànsha kakesè to.

¹⁵ Nènkù ndi ngèèla meeji nè misangu yàbùngì mbaledi ke bàtù buumuka; Ndi mumanyè nè kùtu misangu mikwàbò bi—bìlongelu, nè bikwàbò. Nènkù kàlaasà kàà Dyàlumingu bu cyàbìbìdì cimwè cyà dībà nànkù awu, anyì dībà òimwè mu dyàlumingu mu dindà, nè bàà pa buloba bàdi nè bānà munda mwà lumingu lujimà, nè bàbàpàya bintu byàbùngì kutàmba mulongeshi. Nènkù misangu yàbùngì, misangu mipitèpìtè bùngì, mulongeshi ùdi nè ndambù wa tusunsa dikùmi nè tùtaanu tùdiye ùlongesha, pàdiye ùdilaaba tupenta ku mishiku nè ùlongolola nsukì yèndè, ùlekela bānà bènza mùdìbo mwà kwenza.

¹⁶ Nènkù pashìishe kumbèlu kabèèna bàpeta dilongesha dyà bwena Kilistò to nànsha kakesè. Maamù ùdi pambèlu pàapa mwaba kampàndà mu ditwà dyà kartà, nè taatù mupwèkè ku nzùbu wa manàyi, nè—nè mwanèètù wa bakàjì ùdi pambèlu nè muntu kampàndà nè kàshinyì kàà sport. Nènkù's ke bwalu mbwòbù abu, nwamònu's. Ncinyì, mpenyi patùdì—mpenyì patùdì tuya's? Nudi ànu, cidi ànu cidi. . . Mbìbì be. Nè pashìishe tudi tujandula nè bintu byònsò ebi pàmwè. Junior mupàtuke, wènda ùbànda ùpweka nè mùsèèsù munkaci mwà kunàya, pa ntukutuku wèndè. Nènkù, kaa, bàmwè bānàya ndundu wa tubwengè nè bakwàbò bānàya mààbì, nènkù ncintu kampàndà bwà kusànkishiibwa. Nè èkèleeziyà mmulekela.

¹⁷ Misangu yàbùngì, pashìishe bàdi nè kasùmbù kaa balombodi muntwamu; bu mpaasàtā awu mwà kulenga kaabwalu kampàndà kakesè kàvwà—kàvwà kènzè bu kàbèngangana, anyì wàmba cintu kampàndà pa bwalu abu, kasùmbù aku's nkafwànyine kumubiikidisha, dīnà dyèndè ndifwànine kuya ku ciimamwèndè wa bukalenge nè yèyè ùvwa mwà kwipaciibwa. Nànkù, nudi numòna's, ncilwè tikè wa byàkudyà, pamutù pàa musadidi mulaaba bwà kuyiisha Èvànjeeliyò. Nwamònu anyì? Ncyà bushùwà. Ncishààle cintu cidibo baswè. Cidi—cidi n'tikè wa byàkudyà. Bàdi nè cyà kushààla mwaba awu, kupeta difutu dīmpè. Tèèlejà, mwanèètù, Nzambi ikàlàku luse nè muntu udi mufwànyine kusùmbisha bwanààbutè bwèndè bwà cyòci aci. Tèèlejàayi!

¹⁸ Tudi dikèngela nè muntu wíkala mwà kwambula Èvànjeeliyò, byanza bitupù, kàyì mwelè gants kampàndà yà cyena-màngumba ku byanza to. Kumwadija mwab'awu ànu mùshindù wùdiye mufùndiibwe awu, nè—nè kulekela bipàtu bimata kwàswàbi aku. "Cisàbaatà cyòci cikùmbàna," mààmù ùvwa nè ciibidilu cyà kwamba nè: "civwàle." Wàmba nè: "Kùsonji ditala dyèbè to." Mpindyewu, pa nànkù tudi nè bintu bìvwà bikèngela twètù kwikala tutèèleja.

¹⁹ Mpindyewu, mfùmù ewu, Uzìyà, mwikàle mwànà mulenga wa dikèma. Ùvwa nè taatù wa difwàna dyà Nzambi. Mamwèndè

ùvwa mufùmìne ku Yelusàlèrà, nè taatù wa difwàrà dyà Nzambi uvwa mfùmù kumpàlà kwèndè, nè dilongesha dyà mùshindù awu dyàkapòngolokela munda mwà nsongààlùmè awu.

²⁰ Mèmè ncyèna ní n'Démocrate ní n'Républicain to. Ndi mwenzè ànu disungula òmwèpelè, nè diine adi òvwa mbwà Kilistò. Nè Yèyè ùdi—Yèyè ùdi. . . Mèmè nèncimunè nè Cyòci aci.

²¹ Mpindyewu, ndi—ndi ngèèla meeji nè Mfùmù wa ditunga mutàmbe bunène, nànsha nànkù, utùkaadikù bapetè, ùvwa ng'Abraham Lincoln. Kì mbwalu nè yèyè ùvwa mwena Kentucky, yèyè pèndè to, kàdi mbwalu muntu awu mmufùmìne ku cijèngù. Nènku mikàndà yònsò yìvwàku muntu awu mupetè kacya, kwambwila ànu mu cikondo cìcìvwàye nsongà, ngèèla meeji, too nè mwà kakolàye, cìvwa m'Bible nè—nè *Ditanta Dyà Mwena Lwendu* dyà Bunyan. Nwamònu's, aci cyàkafùmba munda mwèndè (cinyi?) “Abe wa meeji matòòke” awu. Yèyè. . . Cyùdi ubala, cyùdi wenza, ke cìdi cìfumbà ngiikàdilù webè. Cìdi—cìdi cyàmba cyùdi. Nènku mpindyewu, nudi numòna's, yèyè wàkabala mwaba wùvwà nè “wèwè mwenze bibi, udi ufuta bwà cyòci aci; wèwè mwenzè bìmpè, Nzambi mmufwànyine kucitwa mushinga,” nènku cyòci aci cyàkamufùmba cìvwàye aci. Nènku mamwèndè, kàbidi, mukàji wa—wa difwàrà dyà Nzambi's. Yèyè nè: “Kwòkò kwikàle luumù kampàndà lwà kupèesha muntu kampàndà, ùvwa mmaamù wa difwàrà dyà Nzambi,” wakamukolesha mu mùshindù mujaalàme. Mpindyewu aci kwenzaci, ngèèla meeji, ndi mufwànyine kwamba nè, nànshakù umwe wa kùdìbo, pìikalàye kàyì Mfùmù wa ditunga wa mutàmbe bunène utùkaadi bapetèku. Yèyè wàkafùmina ku bitupù, kàdi Nzambi kumuvwija Mfùmù wa ditunga bwalu ùvwa muntu wa meeji matòòke nè muntu mwìmpè.

²² Mpindyewu, tudi tusangana nè mwànà wa balùme ewu ùvwa mwómùmwe. Mwikàle nè baledi bàà difwàrà dyà Nzambi aba, wàkenza cìvwà cijaalàme. Pààkavwijibwàye mfùmù, nènku pàvwàye nè bidimu dikùmi nè bisambòmbò, wàkalèngulula cìdiidi cyònsò nè mmwènenù yà mwasàkànaayi yà ditùkù dyèndè, kàdi wàkàkwàcila Nzambi mudimu nè kaneemu kààbùngì. Cyòci aci cyàkamuvwija mfùmù mulelèlè. Bwà kulèngulula cìdiidi nè mmwènenù wa cyena leelù, nè kukwàcila Nzambi mudimu nè kaneemu kààbùngì, aci's cìvwa cìmpè cyà dikèma. Bukalenge bwèndè, Nzambi wàkabùbènesha, bùvwa bunène mu mùshindù wà nè bwàkalondela bwà Solòmò. Nè Solòmò ùvwa nè bwà butàmbe bunène bùvwakù; kàdi mwànà wa balùme ewu ùvwa mulondèle Solòmò, mu bukalenge bwèndè.

²³ Cìvwa di—dikwàcisha dinène kùdi mupròfetà wa citende Yeshàayi ewu, nè bu mùvwàye nsongààlùmè mu cikondo aci, mwikàle ànu ùcìbangilakù. Bu mùvwàye mulediibwe mupròfetà, ùvwa utàngila bwenzeji bùvwà muntu ewu naabù pa

bantu; nè mumòna kùvwà bwenzeji bwèndè bufùmìne, bwalu wàkeeyemena Nzambi, nè dishindikà dyònsò. Nènku wàkadì nè. . . Wàkamòna kàbìdì, yèyè Yeshààyì's, mwikalà Nzambi mwà kubàbènesha aba bìikalà nè lulamatu ku Dìyì dyà Nzambi abu.

²⁴ Mpindyewu tudi bamanyè nè nsongààlùme ewu ùvwa muswè kushààla nè mèyì makùlù à cìvwa Nzambi mwâmbè. Yèyè wàkashààla mulamè mèyì Èndè matùma. Uziyà kàvwa mwà kuya ku dyàbalùme anyì ku dyàbakàji to. Yèyè wàkashààla ànu nè cìvwa Dìyì dyâmbè, ke Nzambi kumutwà mushinga nè kumubènesha mu byònsò bìvwàye wèza, kutantayè, mutùngùnuke ànu nè kuya. Nci—ncileejilu kaayì cìdici bwà nsongààlùme kanà yònsò ewu's wè!

²⁵ Ndi ngèèla meeji nè bu nè tuvwakù nè bantu leelù ewu, èkèleeziyà yètù yìdì yàmba nè mbeena Kilistò ayi, bu bôbò mwà kudilaminýina ku bintu byà pa buloba nè kwikala nè nsòmbelu wa mùshindù awu, bìvwa mwà kufila bwenzeji kùdì beena Kilistò bàà bitende bwà kwenzabò nànkù awu. Kàdì, leelù ewu, pàdìbo bàteketa mu mabòko, bànwà maalà nè mfwankà, nè bènza maalù à lukutukutu, kàdì bìikàle ànu bàteeta kulama ditonda dyàbò dyà bwena Kilistò, aci's cìdì cìtèèka dibwe dyà cìlèndwishì mu njila wa bantu bakwàbò, nè bìbàlwila bikolè be.

²⁶ Vùlukààyi nè, Bible mmwâmbè nè: “Nudi mikàndà mifùndilangana, yìdì nè mwoyi, yìdìbo bàbala kùdì bantu bònsò.” Mpindyewu, bantu bààbùngì kabàtu bàbala Bible to, kàdì Nzambi mmukuvwiye muleeji mpàla udi nè mwoyi. Wèwè's udi mukàndà mufùndilangana wà wènda, uvwa nè cyà kwikala Bible udi wenda, Kilistò munda mwèbè. Bìvwa bìkèngela wèwè kwikala Dìyì dyà Nzambi didì dyènda. Kàdì wèwè ujìkula mùdì mwena Kilistò, kàdì kùyì aci to, bwenzeji bwèbè, bwèbè. . . Cyùdì ufila bu bwenzeji aci, necìkufikishè ku dilumbulula bwà misùukà yàbùngì yùdì mupàmbwishe, kule nè Kilistò, mu Ditùkù dyà Cilumbulwidi adi.

²⁷ Ndi ngèèla meeji nè mbilààle kutùdì, dilòlò edi, bwà kwela meeji pa bwalu abu, bwalu mulùme yònsò, mukàji, mwànà wa balùme nè wa bakàji, mmumanyè nè udi upicila ku Cilumbulwidi. Udi mufwànyine kupànduka ku *cikampàndà*, *cikansanga*, anyì *cikankènga*. Udi mwà kucìmuna citàdì cyà makàsà à mushinga wèbè, nè udi mufwànyine kupànduka ku Difuta dyà bitàdì pa byùdì mupetè ku mushinga. Udi mufwànyine kwenza cintu cìmwè anyì cikwàbò. Udi mufwànyine kupicisha mikàlù yà lùbilù lukòsa kàdì baampùlushì kabàyi bakukwàte to. Kàdì, dīngà ditùkù, Cilumbulwidi necìkukwàte. Aci's ncyà bushùwà!

²⁸ “Nènku's tudi bamanyè nè muntu ùdì nè cyà kufwà, nè paanyimà pàà cyòci aci Cilumbulwidi.” Lufù kī ncintu cikolè to. Cilumbulwidi paanyimà pàà lufù, ke citùpà cibì ncyòci aci. Nè mwaba awu, cyùdì mwenzè mu nsòmbelu ewu, nè mùshindù

wûdi mwenzeje bakwàbò, nebikengelè bwà wêwè kulumbulula bwà bwalu abu mu Ditùkù adi.

29 “Mmunyi mùvwàbi bikèngela bwà twètù kutàmba kutèeka ku luseke bujitu bwònsò, nè mpèkaatù ùdi utùjìngila bipeepèle nùnkù, bwà twamòna mwà kunyeema nè lutùulù lubilu lùdi lutèeka kumpàlà kwètù elu, batàngile,” kî nku twitabàayi, ku dîngumba, kùdi muntu mukwàbò kampànda to, kàdi: “kùdi Yesù Kilistò Udi mubangi nè mujikiji wa Diitabuuja dyètù.”

30 Mùshindù mwinè wùvwàbi bikèngela bwà twètù kwikala twela meeji ku bintu abi's, balundà bàanyi, nè disù dikolè nè kaneemu kònsò, patùdi tumòna Ditùkù edi dyènda diseemena apa, nè mumanyè nè dîbà kanà dyònsò mabèji à mwoyi wèbè, mukàndà awu, wùdi mwà kukàngiibwa dilòlò edi, nè mààlabà dîbà nediikalè dimanè kupita bwèbè wêwè bwà kucyènza. Kulaadikiji cyùdi mwà kwenza leelù ewu, bwà mààlabà to, bwalu mààlabà ùdi mwà kubènga kulwaku. Balùme nè bakàji, nsongaàlùmè nè nsongaàkàji, bàdi mwà kwikala basòmbe kaaba aka dilòlò edi, biikalè mu nzùbu wa bitàlù kumpàlà kwà bufuku kucyàbu. Mbulelèlè. Nè dîbà adi mukàndà wèbè mukàngiibwe, nè kwàdyakupetakù mpungà mukwàbò nànsha. Eci cidi mwà kwikala mpungà wa ndekeelu wuwikalèku nendè. Elà meeji ku bwalu abu, nè disù dikolè. Wêwè udi wamba nè: “Èè, pàmwàpa kabyèna nànkù to.” Pàmwàpa kabyèna nànkù to, kàdi's mbifwànyine kwikala nànkù's. Kàdi, vùlukàayi nè, dîngà ditùkù mukàndà awu newùkangiibwè, nè cinùdi munkaci mwà kwenza mpindyewu eci.

31 Nè nangananga nwènù bàdi balaka mukana nwamba munùdi beena Kilistò abu, tàpulukàayi nè maalù à pa buloba. Kwikadi nè cyà dyenza nànsha cimwè nè maalù à pa buloba to. Bùnyeeme, bwalu muntu kampànda ùdi munkaci mwà kukutàngila's. Muntu kampànda ùdi munkaci mwà kukutàngila. Nènku wêwè kwakuditùma ànu wêwè nkààyebè kuntwaku to, kàdi neuye naabò too nè mu mwaba mubi, nènku nebikengelè bwà wêwè kulumbulula bwà bwenzeji bwèbè.

32 Mùshindù mwinè ùvwà mupròfeta ewu mutàngile muntu ewu, nè mumòne nè Nzambi wàkamubènesha, nè mùshindù mwinè wùvwà bwenzeji abu's wè! Mùshindù mene wàkatanta muntu awu, cyàkamwenzela Nzambi's. Ùvwà nè nsòmbelu uvwa—uvwa mulenga wa dikèma, mubènèshìibwè kùdi Nzambi, nè kàvwa muswè kukùdimuka ní nku dyàbalùme ní nku dyàbakàji to.

33 Mpindyewu apa tуди tusangana cileejilu cikwàbò mwab'ewu mu muntu ewu, muntu ewu Uziyà, mfùmù munène wàkenda kale wàwa nè Nzambi. Bible mmwambè nè: “Pàakadyùmvwà mfùmù nè yèyè ùvwà mukùbìibwe, kudyùmvwa nè ùvwà bimpè, dîbà adi yèyè kubàndishìibwa mu mwoyi wèndè, nè maditàmishi.”

³⁴ Lekèlaayi ngiimanè mwab'ewu bwà kwamba bwalu ebu, kakùyi tuseku to, mwanèètù wa balùme, mwanèètù wa bakàji. Nzambi mmunwenze batèèleji bàànyì dilòòlò edi. Ndi nè cyà kwikala nè dīsù dikolè dyà menemene mu cīndi ngamba, nè nudi nè cyà kutèèleja nè dīsù dikolè dyà menemene.

³⁵ Ke lutàtù lùdì naalù bantu bààbūngì leelù ewu alu. Badi bèèla meeji nè. . . Tudi nè bàmwè bàà ku bàna bèètù bambi, bàmwè bàà kùdìbo bàtu bàfika pa kaaba kampàndà, pàmwàpa, nè midimu minène yà bwambi, too nè mùdìbo bàdyùmvwa mu dikùbiibwa. Tukàadi bacipetè, nè bamanyè nè ncilelèlè. Bambi bààbūngì mu ditùnga leelù ewu mbabange kunwà maalà. Bàmwè bàà kùdìbo bàdi bèèla meeji nè: “Èè, ndi nè bukalenga bwànyì bukesè bwibaka bunyùngùlùkile. Kakwènakù kabingilà bwà mèmè. . . Bantu abu mbannangè bikolè menemene, mu mùshindù wà nè kabàadyàkutèyakù ntèmà nànsha mikesè to mèmè mwenzè *cikampàndà* anyi mwenzè *cikansanga*.” Lekèlè nkwaambilè, mwanèètù nè, kùdi Kampàndà Udi mutàngile, nè mwinè awu n'Nzambi. Muntu nànsha umwe kèna mu dikùbiibwa to pambèlù pa Nzambi.

³⁶ Mīngà misangu tutu tukafika mu mùshindù wà, twela meeji nè: “Nzambi ùdi ùtùbènesha. Mmumpèèshe Cadillac. Mmumpèèshe mudimu mutàmbe bwimpè. Mmumpèèshe *cikampàndà*.” Aci kí ncimanyinu cyà nè kwèna mwà kuumusha mabènesha Èndè kùdi to.

³⁷ Paùdi ubàndishiibwa, nè umvwa nè: “Èè, musangu kampàndà mvwa mulàale bufùkù bujimà nsambila, musangu kampàndà mvwà ngèza *cikampàndà* nè ngèza *cikansanga*, kàdi ncicyenà ncyènza kàbìdì to,” wèwè udi mu mwaba wà njìwù.

³⁸ Ke lutàtù lùdì naalu beena Mpenta bèètù ndwòlò alu. Pààbì, kale wàwa, kùkaadi ntàntà mule, patùvwà nè masangisha ètù makesè kwīnshì eku mu disangu mwaba kampàndà, nè bakàji kabàyi bàvwàle nshèsheetè mile bīmba mutumbi kwīnshì kwàka, bàvwa nè cyà kusambila bufùkù bujimà, nè bikwàbò byònsò; baampùlushì bàvwa bànwèla mu bùlokò, nè nuvwa nushààla mu bùlokò, nè bikwàbò. Nuvwa nusambila. Maèkèleeziyà, màngumba ónsò, àvwa ànùseka nè ànwèlulwila. Kàdi mpindyewu Nzambi mmunùbàndishe, too nè muwàpecì yimwè yà ku èkèleeziyà yà mitàmbe bwimpè mu ditùnga, màngumba manène à bukolè, nwènù è kubanga kudyùmvwa mu dikùbiibwa. Dìmukàayi, adi's ke dībà dinùdi nubàndishiibwa. Dībà adi, pàdi Nzambi ùtùma Cintu kampàndà, kwèna mwà kuCiitabakù kàbìdì to, bwalu ukàadi mumanè kufila bujaadiki bwà *cintu* eci. Dībà adi udi ubanga kudyùmvwa mukùbiibwe, ke dībà dyùdi mu njila mutàngile ku cibùlà cyèbè ndyòdi adi. Aci's mbwà màngumba. Aci's mbwà matùnga.

³⁹ Tàngilàayi ditùngà dyètù, musangu kampàndà's dìvwa

dimwè dyà ku matùnga manène à nsòmbelu mulenga à pa buloba. Ditàngilaayi aku leelù ewu's, ke cintu cyà kusekabo cyà buloba bujimà, nè bukooya kupìta ní cinyi ní ncinyi cyònsò cindiku mumanyè.

⁴⁰ Ndi mwenze ànu ntùuluka mu ndèkè, nè mbwela mu Loomò, nènku nya ku Sant' Angelo, bwà kubwela mu nkità yà mwĩnshì mwà buloba ayi, mèmè kuumvwa bundù pàngàakamònà cimanyinu citèeka ku—ku nkità yà mwĩnshì mwà buloba yà mu Sant' Angelo ayi, cyàmba nè: “Mwàkù bwà bakàjì bònsò bàà beena Àmèrikè: Bu nwènù mwà kuswà lwàtaayikù bilàmbà pambidi kumpàlà kwà kubwela mu nkità yà mwĩnshì mwà buloba eyi, bwà kuneemeka bafwè.” Bàbwela muntwamu bavwàle tùpùutùlù, nè mipanù, mu mwaba bu mùdì mu Loomò amu; nè pashìishe bìvwa bikèngela kwambabò: “Kùdì bakàjì bàà beena Àmèrikè: Bwà kutwà bafwè mushinga, nè vwàlaayi bilàmbà.” Mòna's, s'ncilwè cimpèpèmpè cibì mu mimpèmpè yà dyùlu! Nè mfrangà yètù yònsò yà dyàmwàmwà dyà mbù ayi, nè mfrangà misombeshangana, nè bikwàbò byònsò mùshindù awu, kabyàdyàkusumbakù bulundà to.

⁴¹ Cidì citùkèngelà mu ditùnga edi, nè katwàdyàkucipeta to, kàdi cidì citùkèngelà ncikondo cyà—cyà dikezula dyà nzùbu; kì ndikezula dyà nzùbu dyà cidìdì to, kàdi nditàbuluja ditùma kùdì Nyumà Mwimpè diikalà mwà kumukòmba kubangila kuulu too nè kwĩnshì. Ke cidì cikèngela èkèleeziyà yètù aci. Ke cidì cikèngela bantu bèètù aci. Ke cyòci aci, bu bantu-nkààya, cidì citùkèngelà. Bwà bwenzeji bwètù... Patùdì tudibàndisha nè twamba nè: “Mèmè ndi mwena Mpenta. Nkàadi mwakùle mu myakulu. Nkàadi mwelè mbilà. Nkàadi mujè maja mu Nyumà.” Udi mufwànyine kwikala mwenzè nànkù, kàdi lekèlè nkwanbìlèku cintu kampàndà, mwanèètù, aci kì ndikubiibwa bwèbè wèwè to, nànsha kakesè.

⁴² Tudi tusangana nè pàakabàndishiibwà Uziyà mu mwoyi wèndè, tudi tusangana nè Nzambi wàkamutuuta. Cyàkenzàye ncinyi? Wàkateeta bikolè bwà kuteeta kwangata mwaba wà mwambi kampàndà. Wàkeela meeji nè bwalu wàkadibàndisha, Nzambi wàkamubènesha, kumuvwija muntu munène, ùvwa ànu mwà kwenza cyònsò ciwàye muswè kwenza aci.

⁴³ Mwà muumvwè nsongàalùmè kampàndà ùngambila kì nkwanji kwenza ntàntà mule to, wàmba nè: “Udi mumanyè's, Nzambi mmunnangè bikolè be, Mwanèètù Branham, Yèyè ùtu ànu ùndekela ngènga cyònsò cindì muswè kwenza aci. Kàtu ùbucyùka to.”

⁴⁴ Ndi ngùmva byàbùngì leelù ewu byà mùdì Nzambi mwikàle Nzambi mwimpè. Ke cidìYe. Ncyèna ngèèla aci mpatà to. Yèyè ùdi Nzambi mwimpè. Kàdi Yèyè ùdi kàbidì Nzambi wa ciiji cikalè. Cijila Cyèndè cidì cilòmba bwakàne. Mikenji Yèndè yidi yilòmba cilumbulwidi. Kwòkò kakùyì cilumbulwidi

cyà mikenji to, mikenji kayèna nè dikwàcisha nànsha òm̀wè to. Mbifwànyine kwikala bimpè ku cinyi bwà kwamba nè: “Bidi bibèngangana nè mukenji bwà wèwè kunyeemesha kusambuka mudilu mukünzè wùdì kwínshì eku,” pàdiku kakùyi cibawu paanyimà pààci? Nwamònu’s, kí ncifwànyine kwikala mukenji to. Kabèèna mwà kwenza kantu nànsha kàmwè pa bwalu abu to; kakwèna cibawu to. Kùdi cibawu bwà dishipa dyà mikenji yà Nzambì, nènku, necìikalè, newìkalè nè cyà kufuta too nè ku dyeyà dyà ndekeelu kumpàlà kwà wèwè kupàtudiibwa.

⁴⁵ Mpindiyewu bantu bààbùngì leelù ewu bàdi bènza cìlèma cyà cyènza luse aci ànu mwàkenzà mulùmyàna ewu amu, pààkadibàndishàye, kulwayè munène, kudyùmvwayè nè ùvwa nè bintu byònsò mu byanza byèndè, kudyùmvwayè mu dikùbiibwa nè: “Nzambì mmunnangè bikolè, mu mùshindù wà nè kakwèna cintu nànsha cìmwè cìdì mwà kuntàcisha mpindiyewu to.” Pààkenzàye nànkù, wàkadyèla mu mùshindù wùmwèwùmwè wàkenzà Nebùkàndànèèsà musangu kampàndà awu, munùdì nwènù babadi bàà Bible bamanyè amu. Pashìishe tudì tusangana nè wàkatuuciibwa nè nsudì bwalu wàkateeta kwangata kaaba kàà mwambi kampàndà.

⁴⁶ Ànu àbìdì àdì panshì aa, ntu ngaakula mu buloba bujimà bwà Beena Kantu-ku-byanza bàà Èvànjeeliyò mu Kaabujimà, kùkaadi cikondo kampàndà, mvwa musòmbe mu mwaba kampàndà, mùvwa mmu Jamaïque mwàmwa, tuvwa twenzamù disangisha kampàndà.

⁴⁷ Ndi mubànangè, bwalu mbantu bàdì bàfùmina mu èkèleeziyà yònsò. Bidi bimpèèsha mpùngà bwà—bwà kwakula. Míngà misangu èkèleeziyà kayìtu yìkwàcishangana mu mudimu to, kàdi beena kantu-ku-byanza bààbò bàdì bàkwàcishangana mu mudimu, bóbò—bóbò’s nebenzè bu bàdì bìmanyinakù beena kantu ku byanza.

⁴⁸ Pa nànkù mpindiyewu tudì tusangana nè, mwômò amu, mvwa ngènza disangisha. Dilòlòlò adi patwàkalukilà ku Cìlààla-beenyi cyà Flamingo aci, Mémè nè: “S’ndi nè bundù bwènù nwènù balùmyàna.” Mémè nè: “Mbyà bundù be. Byònsò binùdì nwakula abi, kumpàlà kwà balombodi bònsò bàà cidiidì nè bikwàbò, nè dibanda-dipweka dyà beena kantu-ku-byanza munwemu emu, bìvwa bwà nè: ‘Mvwa nè kaamushinga kakesè mùnwemu emu, nè ndi mupetè màshinyi à Cadillacs dikùmi nè àsambòmbò,’ anyi ní ncinyi cikwàbò.” Mémè nè: “Bantu abu, kanwèna mwà kudipàlakaja naabò to.”

⁴⁹ Ke lutàtù lùdì naalù èkèleeziyà leelù ewu ndwòlò alu, nudì nuteeta bwà kudipàlakaja nè Hollywood. Nudi nuteeta kumuvwija bu Hollywood. Vùlukààyi nè, Hollywood ùtu ùbàlakana; Èvànjeeliyò ùdi wèla nsèsè. Kwèna mwà kuya mu buloba bwàbò to; bikèngela ùbàtwalè mu buloba bwètù. Ke mwaba wùdì wùkèngela bwà twètù kubàfikisha awu’s.

Bikèngela kubàfikisha kaaba aka, kî ntwètù tuya kuntwaku to. Katwènakù mwà kudipàlakajakù naabò to. Katwèna baswè kudipàlakaja to. Bàdi bàkenka nè bàbàlakana; Èvànjeeliyò ùdi wèla nsèsè nè kalolo nè didipwekesha. Aci's ke dishiilangana pankaci pàà dyela dyà nsèsè nè dibàlakana.

⁵⁰ Mpindyewu tudi tusangana nè, ngàkambila bantu aba, mèmè nè: “Bwalu bùdiku mbwà nè, nwènù bàdi ànu beena kantu-ku-byanza aba, nudi nuteeta kuyiisha Èvànjeeliyò. Kanwènamù nè cyà dyenza to. Twètù bayiishi bitu bitùkolèlè ànu menemene bwà kumulama mululàme. Nènku nwènù bakwètù kanùvwa nè cyà kwikala nwenza nànkù to. Nudi nuteeta kwangata kaaba kabì. Nudi beena kantu-ku-byanza, kàdi kanùteeci kwangata kaaba kàà Èvànjeeliyò to.”

⁵¹ Ke mèmè—mèmè kwamba nè: “Bwalu budi nè, leelù ewu, nwènù nudi nuteeta bwà kwamba bùngì bwà binùdì naabi. Ndishiilangana kaayi nè beena Mpenta bàà kumpàlà's! Beena Mpenta bàà kumpàlà bàvwa batàpùlùke nè bìvwàbo naabi.”

⁵² Mwimbi mukesè kampàndà wa misambu, ùvwa muntu mukesè mwimpè. Ndi mumunangè. Yèyè ùvwa muntu mwimpè, kàdi wàkamba nè: “Mwanèètù Branham, kacya ncitukù muswè kwela dìyì dyèbè mpatà to, anyì kwamba cintu nànsha cìmwè cyà cibèngangana naaDì to.”

⁵³ Mèmè nè: “Abi's mbimpè. Cyòci kaciyi Dìyì dyà Mukalenge to, dibà adi udi nè bukenji bwà kubenga, mwanèètù.”

Ke yèyè nè: “Aci's ke musangu wùmwè wùdi mupùile.”

⁵⁴ Mèmè nè: “Kaa, to. To, to.” Mèmè nè: “Beena Mpenta bàà kumpàla bàakasumbisha byònsò bìvwàbo naabi, nè kubyèlabò mu midimu yà bwambi, nè—nè kupàtukabò.”

⁵⁵ Muiishi kampàndà kuntwaku, wàkamba nè: “Aci's ke cìvwa cintu cibyacibyàlà citùbo kacya benzè.”

Mèmè nè: “Cinyi aci? Nyumà Mwimpè wènza cilèma anyi?”

⁵⁶ Yèyè nè: “Ncyèna ngàmba aci to; kàdi cìvwa cintu cibyacibyàlà citùbo kacya benzè.” Yèyè nè: “Dibà adi pàakabwelà dikòkangana mu èkèleeziyà, kabàvwa nè nzùbu yà kuyakù to.”

⁵⁷ Mèmè nè: “Ànu menemene kabingilà kàakabàsàkila Nzambi ku disumbishabò nzùbù yàbò, pashiishe bàakaya myaba yònsò, bàtangelaja mukenji mu ditunga dijimà. Kabàvwa nè mwaba mukwàbò wà kuya to.” Nzambi mmumanyè cidiYe munkaci mwà kwenza, mulekèlaaYi ànu àlombolè Mudimu.

⁵⁸ Tudi tujandula nè muntu ewu wàkangata mbàbùlà, kubwelayè bwà—bwà—bwà kwenza di—dimukùpa, mbà—mbà—mbàbùlà, kwosha mánànshi. Aci kacìvwa mudimu wèndè to. Yèyè ùvwa mfùmù, kàvwa mwà kwikala mwakwidi to. Ke mwakwidi kulwayè lùbilu paanyimà pèndè, nè kumwambila, wàmba nè: “Kùvwa nè cyà kwenza cintu eci to. Ànu mwena

Lewi ke udi mwà kwenza ciinè aci, kàdi wêwè kwêna mwena Lewi to. Bidi bikèngela muntu mudilambùle bwà cyôci aci, kàdi wêwè kwêna mulàmbula kùdi Mukalenge to. Wêwè udi mfùmù. Nzambi ùdi ùkubènesha. Abi's mbîmpè. Kàdi kwêna mulàmbùdiibwe bwà kwenza nànkù to."

⁵⁹ Misangu yàbûngì tukààdikù bamòne mapà àteeta kutentudiibwa, pàvwàbo kabàyi balongolwela dibìikila adi to. Nè tudi bamòne byònsò ebi. Tudi tucimòna leelù ewu ànu mwàkadibi musangu awu, tumòna muntu kampàndà ùteeta kutentula muntu mwikàle nè Nyumà Mwîmpè; bèèla mbilà bu bôbô, bàakula mu myakulu bu bôbô, kàdi kabàyi ànu bamanyè byàbûngì bwà bwalu bwà Nzambi to ànu mùdi Hottentot kàyi mufwànyîne kumanya mwanu wà beena Èjiipitù wà mafuku cinunu nè bùmwe awu to. Ncyà bushùwà, ànu ditentula, wenza maalu mùshindù awu, bàdivwàdika cintu kampàndà.

⁶⁰ Kàdi lekèlaayi nnwàmbilèku, nwènù bàdi bacitàngile abu, vùlukàayi nè, mwaba wunùdi numòna muntu kampàndà ùcitentula, kùdi cintu kampàndà cishùwashùwàlè mwaba kampàndà. Mèmè mupetè ndola kampàndà, mwikàle wa mafi, cidi ànu cimanyinu cyà nè ùvwa mutentwila pa wa cyà bushùwà.

⁶¹ Kàdi tudi tusangana muntu ewu, Uziyà, ùteeta kwangata kaaba kàa mwakwidi ewu. Nènku pààkamulondàbo munyimà, bàmwambila, wàkafika cijì. Yèyè kukudimuka kàdi kubamanyisha nè: "Nèngènzè cìndi muswè kwenza aci. Nwènù nudi banganyi bwà kungambila cyà mèmè kwenza? Nwènù nungambila cyà mèmè kwenza? Ndi mfùmù, nengenzè cìndi muswè bwà kwenza's!" Kàdi Nzambi kumutuuta nsudì, ànu mwaba awu mene. Nènku wàkafwà, mwena nsudì. Mu cijì cyèndè, pààkabinduluka cijì cyèndè, dibà adi wàkatuucibwa nè nsudì.

⁶² Pashìishe cìvwa dìleesònà kùdi mupròfetà wa citende awu, bushùwà menemene. Paanyimà pàa yèyè mumanè kutàngila muntu ewu ùjuuka, nè ùpeta dipòlomè dyèndè dyà Ph. D., dyèndè dyà LL.D., nè bikwàbò, nè pashìishe ùteeta bwà kwangata kaaba kàvwà kakàyi kèndè to. Wàkasangana nè, nè kuumvwayè cijì bwà bwalu abu. Pààkateetà muntu bwà kumwambila cìvwa EMU MMÜDÌ MUKALENGE WÀMBA, wàkapanga kucìjingulula. Ke Nzambi kumutuuta nsudì, cidi ciikàle cìfwànyikijilu cyà mpèkaatù. Èyo, ku cyôci eci, Yeshàayi wàkayila nè Nzambi ùdi ùtèeka muntu Wendè pa kaaba kèndè. Nzambi ngudi wenza ditèeka mu mudimu adi awu. Katwèna mwà kwangata muntu mîngà misangu kàdi kumwenzela cikampàndà eci to.

⁶³ Inàbànzà mutekète, mwab'ewu ànu àbìdi àdi panshì aa, kungambilayè nè ùvwa...anyì ùvwa nè mwànà mukesè wa balùme uvwayè nè cyà...Yèyè nè: "Wàkadyùm vwa nè ùvwa nè dibìikila." Ùvwa nè bidimu bitwè ku makùmi àsàtù nè bitaanu,

ngèèla meeji. Yêyè nè: “Mwanàanyì wa balùme, wa bidimu bitwè ku dikùmi nè binaayi, ùdi ùmvwa nè ùdi nè dibiikila. Mwanèètù Branham, udikù mwà kumutùma bwà kupetayè dipòlomè dyà Ph.D., anyi cintu kampàndà cikwàbò cyà mùshindù awu, kumutùma ku cilongelu citùmbùke kampàndà anyi? Ncinyi cyùdikù bwà kufila bu mubelu?”

⁶⁴ Mémè nè: “Citàmbe bwímpè cìndi mumanyè ncilongelu cyà kuya ku binù, kutwà binù byèndè panshì.” Mémè nè: “Yêyè’s mmufwànyine kupàtuka munkaci mwà cyòci aci, nènku, katanci aka anyi, mmubangè kuyiila ma-...makùmi nè byònsò pa *cikampàndà*, nè kàbidi pa *cikansanga*, nè kumwelabo diteeta dyà mutù nè Cipidi cyà Dimanya, nè byònsò byà mùshindù ewu abi. Nè pashiishe byònsò byà kùdi Nzambi, bìvwàku munda mwèndè abi, bàdi bàbipàtula,” Mmungàkambà. Kì mbwà kupwekesha bintu abi milongo to, kàdi ndi ànu munkaci mwà kunùleeja mùshindù wùdìbo bàtàmbe kupàtuka mu mulongo.

⁶⁵ Tàngilàayi numòne cidi, eci cyenzèke. Mpindyewu, Nzambi ùdi ùtèeka muntu Wendè pa kaaba kèndè.

⁶⁶ Ànu àbidi àdi panshì aa, mvwa mbala kaabwalu-kalonda kakesè mwaba ùvwà mu—mukàji kampàndà uvwa...mupete disaama kampàndà—kampàndà, dyà—dyà—dyà—bisùlùsulu bisaama, mu St. Louis, mu Missouri. Nè yêyè ùvwà ùsaama bikolè, bikolè be, ke kwambabò nè ùvwà nè cyà—cyà—cyà kufwà. Nènku ùvwà nè mwànà wa balùme mu cilongelu citùmbùke. Ki kufikabò ku dijandula nè, ngàngàbukà ngwàkajandula awu, ànu ntàntà uwayè wèla meeji nè nguvwayè nendè, bwà kwikala nè mwoyi. Ke yêyè nè: “Pàmwàpa kààkwikala kàbidi mwab’ewu ditùkù dimwè anyi àbidi, makwàbò to.”

⁶⁷ Ki kwelabò nsongààlùmè awu nshinga, bwà “kwenzayè nè mwèndè mwònsò bwà kulwa kumbèlu,” mamwèndè ùvwà ùsaama bikolè. Pa nànu nsongààlùmè wa citende awu, munkaci mwà kupeta dibiikila dyà ku nshinga, ùvwà ùdìlongolola bwà kuyayè, kàdi è kupetayè dibiikila dikwàbò dyà ku nshinga nè: “Mamwèbè ùdikù bimpè mpindyewu, èyo. Kùlù to.”

⁶⁸ Èè, pashiishe bu cidimu cijimà nànu awu, mòna’s, nsongààlùmè awu kwenzayè dikùmbula dyèndè dyà ku cidimu kwàbò. Pààkaalukilàye kumbèlu, kwambayè nè: “Maamù!” Paanyimà pàà yêyè mumanè kumwela mwoyi, kwambayè nè: “Udi mumanyè’s, ndi ànu ndikonka’s, paùvwà usaama bikolè, kùtukù ànu kacya mungambile menemene cìvwà cyenzèke to.”

⁶⁹ Yêyè nè: “Kaa, mwanàanyì, ndi nè bwalu bwà kukwambila.” Yêyè nè: “Udi mumanye kaacitanda kakesè kàdi kwìnshì kwà mùsèèsù eku aku, kwìnshì eku kùtù bantù àbu bèèla mikunda mùshindù awu, nè bèèla mbilà nè batùngùnùke anyi?”

Yêyè nè: “Èyowà’s.”

⁷⁰ Yêyè nè: “Mpaasàtà wabò ùdi wìtabuuja disambidila dyà babèèdi.” Yêyè nè: “Umwe wa ku bainàbànzà abu kulwayè

kungambila.” Yêyè nè: “Ngàngàbukà mmungambilè nè kùvwa kunshààdile matùkù àbìdì bwà mèmè kwikala pànu apa.” Yêyè nè: “Pashìishe ke kuyabò kabìikila, kuswàbo bwà mpaasàtà wabò kulwayè bwà kunsambidila, ke inàbànzà awu kwenzayè nànkù, ke mèmè nè: ‘Èè, bushùwà, lwàkù nendè kùnweku.’” Yêyè nè: “Udi mumanyè’s, yêyè awu wàkalwa,” yêyè nè, “kubalayè Mufundu kampàndà mu Bible amu.” Ke yêyè nè: “Yêyè kulwa kuntentekela byanza, nè kunsambidilayè. Nènku, nudi bamanyè’s, mubidi-kapyà awu kunguumukawù, nè mèmè kusàngala.” Ke yêyè nè: “Kaa, Nzambi àtumbè!”

Yêyè nè: “Mààmù, mààmù, mpindyewu’s udi mumanyè cìdì cìmpè kutàmba aci’s!”

⁷¹ Yêyè nè: “Kaa, kaa, to, to, munanga wanyì,” yêyè nè, “ncyà bushùwà nè ncyenzèke.” Yêyè nè: “Butùmbi kùdì Nzambi’s wè! Ndi nkwbambila,” mwàkambàye.

⁷² Yêyè nè: “Mpindyewu udi bulelèlè wenza maalu bu bantu abu.” Yêyè nè: “Kwèna nè cyà kwenza nànkù to, maamù.”

⁷³ Yêyè nè: “Kàdì,” yêyè nè, “munanga wanyì, yêyè’s mmucibadile ànu mu Bible amu. Mmubadile mwaba awu, mu Maakò nshapità wa 16 nè: ‘Bimanyinu ebi nebìfilè aba bàdì bìitabuuja.’ S’kì cyòcì eci *Mwab’ewu* mene.” Yêyè nè: “Twètù, twètù. . . Ncyòcì eci *Mwab’ewu* mene,” mwàkambàye.

⁷⁴ “Kaa, mààmù, abu’s mbàdì kabàyi balongè kàlaasà bàdì kwínshì kwàka.” Yêyè nè: “Bantu bàdì kuntu kwàka abu kì mbalongè kàlaasà to.” Yêyè nè: “Bàdì ànu bantu bapèlè bèètù aba, bisotà ànu mùdì byà mu mùsèsèsù, nè bikwàbò, nè ukabwela mwinè amu.” Yêyè nè: “Mpaasàtà awu. . .” Yêyè nè: “Tudi tuyiila mu cilongelu citùmbùke, nè Maakò 16, kubangila ku mvensà wa 9, kì mmusonsòdìibwe to.”

Yêyè nè: “Butùmbi kùdì Nzambi’s wè!”

Yêyè nè: “Mààmù, mbwalu kaayi ebu neebè?”

⁷⁵ Yêyè nè: “Mvwa ànu munkaci mwà kwela meeji’s, mwanaànyì wa balùme, pìikalà Nzambi mwà kungondopa nè Dìyì kadiyì disònsola, cìvwàYe mufwànyine kwenza menemene nè dìdì disònsola adi ncinyì?” Pa nànkù ndi ngèèla meeji nè aci ncikòse bwalu’s. Kì mmwòmò anyì? “Pìikalà dìdì kadiyì disònsola mwà kwondopa, ncinyì cyènzà dìdì disònsola?” Ke cyòcì aci’s, nwènù balundà bàanyì. Eyowà’s, Mukalenge.

⁷⁶ Mpindyewu, ùteeta bwà kwangata kaaba kàà mukwàbò. Nzambi ùdì ùtèeka muntu Wendè pa kaaba. Nzambi ùdì ùtèeka muntu Wendè pa kaaba. Kèna nè cyà kuteeta kwangata kaaba kàà mukwàbò to. Kwèna nè cyà kwenza nànkù to.

⁷⁷ Mpindyewu cikèenà-kumòna ku ntempèlù. Ku ntempèlù, yêyè wàkapweka pàakajandulàye cyòcì aci apu. Yeshàayì wàkamòna aci, Hezèkìyà, cyàkamwenzekelà, nè pashìishe wàkafwà nè kùvwa ci—ci. . . Ndi nswa kwamba nè Uzìyà, nè yêyè

ùvwa—yèyè ùvwa muumùshìibwe bayè nendà ku citùùdilu cyà beena nsudi, nè mwanèndè wa balùme ùvwa nè cyà kukòòkesha pa kaaba kèndè. Ke dîbà adi Yeshààyi kwenzayè bu uvwa maalu mamutondè, ke pa nàнку kuyayè ku ntempèlù ditùkù kampàndà, bwà kwenza bu udi udyùmushakù bujitu abu—abu.

⁷⁸ Ndi ngèèla meeji nè aci ncintu cîmpè cyà twètù bônso kwenza, ncyà kupweka ku nzùbu wa Nzambi, kupweka nè kwikishishakù musùùkà wèbè, kuumushakù cintu aci mu meeji èbè.

⁷⁹ Pa nàнку Yeshààyi wàkaya kuntwaku nè wàkaditwa mu disambila. Yèyè kèna...Ncifwànyine kwikala mu mapingaja amu, nènku yèyè...anyì pa bwebwebwe mu dîndà, ncyèna mumanyè to. Pa nàнку kupwekayè ku cyoshelu nè kubangayè kusambila, nè kuditwayè mu disambila too nè mwà kabwelàye mu ndòndò wa meeji matòòke. Mpindyewu ke mùshindù ngwówò awu. Yèyè ùkaavwa mumòne cìvwàye ùtàngila aci, pa buloba apa, cìvwa cipangile. Mfùmù uvwa Nzambi mubènèshe awu, mfùmù munène, wa bukolè ewu, mutàmbe bukolè mu ditùnga amu, kàdi nànsha nàнку ùvwa mupangile. Nè pashìishe kàvwa mumanyè cyà dyenza to, ke kuditwayè mu disambila.

⁸⁰ Pashìishe, dyàkàmwè, kubàndishayè mutù wèndè, nè dîbà adi kumònayè Mfùmù mulelèlè. Wàkamòna Nzambi mubàndishìibwe muulu mu Dyulu; musùmbà Wèndè wàkuuja Maulu. Wàkamòna, wàkamòna cintu kampàndà cyà kutàngila, cileejilu cilelèlè. Paùdì utàngila nè uteeta kuvwija muntu kampàndà cileejilu cyèbè, ncyà bushùwà nè neùlalukè, bwalu yèyè neàpangilè. Kàdi Yèyè ùvwa ùteeta kwambila mupròfetà nè: “Kùtàngidi muntu anyì cidì muntu wàmba to. Kùdimunà mèsù èbè kùNdì nè ku cìNdì ngàmba. Tàngilà kuulu Eku; kî nkwasà wa butùmbi wa pa buloba to, kàdi Nkwasa wa butùmbi wa mu dyulu, mubàndishìibwe too nè mu Maulu,” nè cizemba cyà mùzàbì Wèndè cyuje maulu. Ke kutàngilayè muulu. Nè pashìishe kutàngilayè mu ntempèlù, ku ntempèlù kumònayè Nzambi mubàndishìibwe, nè kumònayè Baselèfimà bàà mu Dyulu.

⁸¹ Mpindyewu, Baselèfimà abu kî m'Banjèlò to. Bàdi nè cyà kwikala bwoshi bàà mulàmbù bàvwà bààkwila bantu bwà dipiila. Nè Bòbò abu bàvwà bwoshi bàà mulàmbù.

⁸² Cibwikilu cyà pabwàcì cìvwa pamutù pàà Bifùkùibwà ebi, nè bileeja nè Nzambi ngwa cijila yònsò. Nzambi ngwa cijila yònsò. Nènku Bàvwà bèèla mbilà mikolè nè díyì Dyàbò ditwè nè: “Wa cijila, wa cijila, wa cijila, m'Mukalenge Nzambi wa Bukolè bwònsò. Wa cijila, wa cijila, wa cijila,” ànu mu Bwikadi bwà Nzambi mene.

⁸³ Vùlukààyi nè, bàvwà m'Baselèfimà nè Bakèlùbà bàvwà bàlama Mwaba wà Cijila abu. Mbòbò Abu bàdi bàngata mulàmbù nè bàwùlambula. Kàdi's ke bòbò aba, biikàle nè mwoyi

ànu mu Bwikadi bwà Nzambi mene, bèèla mbilà nè: “Wa cijila, wa cijila, wa cijila, m’Mukalenge Nzambi wa Bukolè bwònsò.”

⁸⁴ Tùtangilàayi lwidi lwàbò bwà katanci kakesè. Tudi tujandula nè ebi bivwa Bifùkiibwà byà mapwâpwa àsambòmbò. Bàvwa nè mapwâpwa àbidi mabwikile kwisù, nè mapwâpwa àbidi mabwikile makàsà Ààbò, nè biikàle bàbùuka nè mapwâpwa àbidi.

⁸⁵ Anji elàayibi meeji, mapwâpwa àbidi mabwikile kwisù Kwàbò, dyàmbedi. Dyàmbedi, neciikalè cinyi? Tùjandulàayi cìvwa mapwâpwa àbidi àvwa mabwikile kwisù Kwàbò awu wùmvwija. Pàdibi nè Nzambi ngwa cijila mu mùshindù wà nè nànsha Banjèlò bàà cijila nè Bakèlùbà bàdi nè cyà kubwikila mpàla Yàbò, bwà kwimana mu Bwikadi Bwèndè, mmunyi mutwimanà twètù? Pàdibi nè bwà kwimana, bikèngela bwà twètù bònsò kwimana, mu Bwikadi bwà Nzambi; Yèyè ke Mulumbulwishi wa kumutù kwà bònsò, nè twètù bònsò netwimanè mu Bwikadi Bwèndè. Nè Banjèlò bàà cijila bàvwa kacya kabàyiku bamanyè nè mpèkaatù ncinyi to; Bàvwa bafùkiibwe Bifùkiibwà byà pabwàbi, kàdi bwà kwimana mu Bwikadi Bwèndè, bikèngela bàbwikilè mpàla Yàbò yà cijila ayi, bwà kushàalamù. Piikalàbi bikèngela bwà Banjèlò bàbwikilè mpàla Yàbò yà cijila, bwà kwimana mwaba awu, netwènzè cinyi, bwà kwikala nè mwoyi mu Bwikadi bwà Nzambi wa Bukolè bwònsò, twètù bashààle mu Bwikadi Bwèndè? Tudi nè cibwikilu, nànsha nànkù, Mashi à Yesù Kilistò. Ncyà bushùwà. Leelù ewu. . .

⁸⁶ Aci’s ki kaneemu kààbùngì. Aci cìvwa cyùmvwija nè kaneemu kààbùngì, mu Bwikadi bwà Nzambi.

⁸⁷ Leelù ewu kakwèna kaneemu kààbùngì to. Kaa, bukesè bùdiku abu, kàdikù ànu kakesè menemene. Cinyi? Nudi numòna bantu bàseka cidìbo bàbiikila nè mbwena Kilistò. Cìikalà mwà kwenzekela muntu awu ncinyi? Pàdi Nzambi ùtùma cintu kampàndà pa buloba, nè bóbò bàcimòna cikwàta mudimu ànu menemene nè Dîyi, nè pashìishe muntu wàkula bwà cyòci aci, nè ùciseka? Nudi bamanyè cidi Bible mwàmbè anyi? Yesù wàkamba nè: “Aci ndipenda, dyà Nyumà Mwimpè, nè kacyakufwidiibwakù luse to.”

“Kaa,” mùdibo bàmba, “Abi mbyà dyabùlù.”

⁸⁸ Wàmanya nè byùdi wamba, mwanèètù wa balùme, mwanèètù wa bakàji. Wàmanya nè byùdi wamba, wèwè ngènzàmpèkàatù. Kakwènakù difwidiibwa dyà luse bwà bwalu abu to. Yesù wàkamba nè: “Kwakula dîyi dibi bwà Dyòdi adi, kabìvwa bifwànyine kufwidiibwa luse mu eci cikondo anyi mu cikondo cìcilwalwà to.”

⁸⁹ Tàngilàayi cìvwa Yè ùfùme ku dyenza, ùjingulula, ùbàmbila meeji àvwa mu mwoyi wàbò. Ke kwambabò nè: “Yèyè’s

m'Beelèzèbùlà," bàbìikila Nyumà wa Nzambì nè "nyumà wa bukooyà, démon wènza cyenzedi cyà Nzambì."

⁹⁰ Ke Yèyè nè: "Nènnùfwilè luse," difuta dyà cibawu kadivwa dyenjùbwe mu cikondo aci to, kàdi, nè Yesù kàvwa mufwè to. "Kàdi," yèyè nè: "pààlwà Nyumà Mwímpè, kwakula bibi bwà Cyôci aci, kacýàkunùfwidiibwakù luse to." Pààlwà Nyumà Mwímpè bwà kwenza cyenzedi cimwècimwè cívwaYe wènza musangu awu aci, kacivwakù mwà kufwidiibwa luse to. Bantu bapangè kaneemu's! Citùdi mwà kutèkemenà ncinyi pa kuumusha cilumbulwidi, ditùnga edi dìdì dibènge Nzambì?

⁹¹ Ditùnga edi, nànsha mùdi ba-Billy Grahams nè ba-Oral Robertses búngì cyanàànà beelè mbilà bènda kàkosolola ditùnga edi, nè màsàlaayi makwàbò manène à ku Nkùrusè àvwà mayè mu ditùnga dijimà edi awu, miikàle àyiisha Èvànjeeliyò, kàdi ùdi wènda ùbùtula cidimu cyònsò eci, mpèkaatù ùdi ànu munkaci mwà kuvulangana.

⁹² Ùvwa mmu—mmutangadiki munène awu, Billy Graham, wakamba ditùkù adi mu òmwè dyà ku masangisha èndè awu, pààkayàye ku New York, wàkamba nè ùvwa mwitabùùje nè "New York ùvwa muvulàngàne byà pa lukàmà byàbúngì, mu mpèkaatù, kacya ànu ku ditàbuluja dyèndè kwàka." Kwambayè pàvwàye munwemu mu Californie emu, mu Los Angeles, kwambayè nè: "Mu bidimu dikùmi anyi dikùmi nè bitaanu kuumukila ku mpindyewu, nè mwena mwàbò yònsò neikàlè nè cyà kwambula cingoma, anyi cintu kampàndà bwà kudikùba, kabèèna mwà kupeta bampùlùshì búngì bukùmbàne to, mpèkaatù mmujuukile kuulu mu mùshindù wà dikèma."

⁹³ Kaa, ncinyi aci? S'ndibùlà dyà kaneemu kùdi Bible. Mbadyombòle mpùngà wabò. Mbapendè Nzambì nè bamwelùlwile. Ncyà bushùwà.

⁹⁴ Mpindyewu tùcitwàlaayi pabwípì ndambù nè kwètù kumbèlu, tàngilàayi màèkèleeziyà, cidiwu mènzè's. Bàbúngì bààkùdibò paùdi ukòsolola ditùnga...Paùdi upeta muntu mwikàle nè búngì bukùmbàne bwà—nè búngì bukùmbàne bwà bukolè bulelèlà bwà Nzambì mu yèyè, bwà kwambila bantu bwà njila yàbò yà mpèkaatù! Bàpeta muntu kampàndà udi mwà kubàmbila nè bàvwa nè cyà kulediibwa cyàkàbìdì, kabìyi dilabulangana dyà ku byanza anyi kubànda kwangata dipàngadika to. Bikèngela bàlediibwè cyàkàbìdì; kí nkufùnda dìnà dyèbè mu mukàndà kampàndà, anyi kukashàala wa mu èkèleeziyà kampàndà, anyi kulabulangana ku cyanza, anyi dimyaminangana kampàndà dyà màyi, anyi dibàtiiza kampàndà to. Kàdi kwikala mulediibwe kùdi Nyumà wa Nzambì, mutàpùlùke, Mwoyi wà Nzambì musòmbèle munda mwèbè, ùDileeja wòwò mwìnè patòòke; kí ng'anu leelù, nè mààlabà to, kàdi matùkù èbè ónsò à mwoyi; nè disànka mu mateeciibwa èbè nè makèngeshiibwa èbè, udi mufwànyine

kutùngunuka, mumanyè nè njila mmukàngula kumpàlà kwèbè, bwà kuya mu Butumbi. Ke mùshindù wà Èvànjeeliyò ng'wówò awu's! Paùdì ubàsangana mùshindù awu, udi uMuyiisha; kàdi walukila cidimu cìdì cilondà, kî bôbò abu ànu mwomùmwe, cintu cimwècimwè aci, cikòlà citàmbe bubì, nè citàmbidile ànu kutàmbidila. Paùdì ànu utàmba kuyiisha ucilwisha, kàdi's ke kutàmbaci kubiipà. Ncinyi aci? Ndiipanga dyà kaneemu kààbùngì.

⁹⁵ Nè pashìishe byà pa lukàmà makumi citèemà nè bitaanu byà bantu abu bàyaayà mu èkèleeziyà, bàdì nè dìnà dyàbò mu mukàndà, bàmba mùdìbo beena Kilistò. Bantu wàmba mùdiye mwena Kilistò, ùnwa mfwankà, nè ùnwa maalà, nè ùnàya twartà twà mfrangà, nè wènza minèkù yà bundù. Balami bààbùngì mu kasùmbù aku, biikàlè nè bakàjì umwe, bàbìdì, nè bàsàtù, nè bànaayi. Aci's ncilelèlè. Bundù kaayi's wè! Bakàjì bìmba mu kòralè, nè nsukì mibebula. Bible mmwàmbè nè: "Yèyè mmuntu wa ùfwishangana bundù." Bilaabu kwìsù! Kùvwa mukàjì ànu umwèpelè wàkadilaaba bilaabu kwìsù, mu Bible, ùvwa ny'Ìzàbèlè awu. Nzambi wàkamudiisha kùdì mbwa, pa nàнку nudi numòna cìdìYe wèla meeji pa bwalu abu's. Kàdi dībà adi udi ulwa kubàmbila bwà cyôci aci; cidimu cyàlondà, walukila, ubàsangana batàmbe kubiipa kupita dyàmbedi. Babùle kaneemu, kabèèna nè kaneemu to, kakwèna—kakwèna meeji à nsòmbelu wa kaneemu to.

⁹⁶ Lekèlaayi nnwàmbilèku cintu kampàndà, nwènù bakàjì, bansongààkàjì, nè banunu, kàbìdì's; bàdì bàpàtuka pambèlu apa nè nkanzu eyi pambidi, tulàmbà etu twà kale tubàkwàte ncyoncyoncyo, nè tùpùtulù. Wèwè udi wamba nè: "Kabìvwa bikèngela bwà wèwè kwakula mùshindù awu to, Mwanèètù Branham." Bivwa bikèngela mèmè kwenza nàнку. Awu's mmudimu wànyì. Eci's—eci's cyambilu.

⁹⁷ Muntu kampàndà ùvwa mumbiikile, àbìdì àdì panshì aa, umwe wa ku batangadiki bàà batàmbe bunène bàà beena Mpenta bàà mu ditùnga emu. Yèyè nè: "Lekèlè bantu abu kwà tálàlàà."

Mèmè nè: "Wèwè udi nganyì bwà kungambila bwà kubàlekela kwà tálàlàà?"

⁹⁸ Yèyè nè: "Ndi mukunangè." Ke yèyè nè: "Mudimu wèbè wà bwambi ngwà kusambidila babèèdì."

Mèmè nè: "Nkuyiisha kwà Èvànjeeliyò, mwanèètù."

⁹⁹ Ke yèyè nè: "Tàngilà, Mwanèètù Branham," yèyè nè, "mòna's, bantu abu's bàdì biitabuuja nè wèwè udi mupròfetà."

Mèmè nè: "Kacya ncitukù mwàmbè nè ke cìndì to, kî mmwòmò anyì?"

¹⁰⁰ Yèyè nè: "Kàdi's bàdì biitabuuja nè ncyùdì. Bwà cinyì kùyikù ulongesha bakàjì abu mwà kupeta Nyumà Mwímpè, nè mwà

kupeta mapà nè kwenza cintu kampàndà, pamutù pàà misangu yònsò kubàtandisha bwà mùshindù wùdibò nè cyà kulwàta nè bìdibò munkaci mwà kwenza? Bwà cinyi kùyikù ubàlongesha bintu byà mùshindù awu, bwà kubàkwàcisha?”

¹⁰¹ Mémè nè: “Mmunyi mùndi mwà kubàlongesha makùmi makolè pàdibò kabàyi nànsha baswè kuyiila ABC?” Nudi bamanyè cidi ABC anyi? Misangu yònsò kwitabùùjà ànu Kilistò. Ncyà bushùwà.

¹⁰² Mpindyewu, mpindyewu mmunyi mùdi mwà kucyèenza, mmunyi mùdi mwà kucyèenza? Mbimwèke ànu bu nè kùdi dicincimikiibwa kùdibò, cintu kampàndà kî nciswè kubàlekela bàcyèenza to. Cidi cìcìwija Sodomà wa cyena leelù. Ke dîbà ditùdi tusanganyibwamù adi, bintu byà byèenza bwòwà bìdi munkaci mwà kwenzeka mu ditunga leelù ewu ebi.

Ke yèyè nè: “Èè, tàngilà . . .”

¹⁰³ Mémè nè: “To, ncyèna nè ndongamu yà kutùùdila mfrangà to. Ncyèna nè èkèleeziyà wa kungiipata to. To, mukalenge.” Ke mémè kwamba . . .

Yèyè nè: “Awu’s mmudimu wà mpaasàtà, bwà kwenza nàнку.”

Mémè nè: “Kàdi bôbò kabèena bàwèenza to.”

¹⁰⁴ Dîbà adi, aci ncitàngile muntu kampàndà, bìkèngela dîyi kampàndà dyèlè mbilà bwà kucilwisha, bwalu ncibi. Ncyà bushùwà nè mbibi. Kaneemu kààbùngì, kuCineemeka.

¹⁰⁵ Nsongààkàji kampàndà wa citende wàkangambila musangu kampàndà, wamba nè: “Mukalenge Branham, kabàcyèna benza bilàmbà bikwàbò to ànu ebi’s.”

¹⁰⁶ Mémè nè: “Bàcidi ànu basùmbisha bilàmbà bijimà, nè bàdi nè màshinyi à bilàmbà.” Ncyà bushùwà.

¹⁰⁷ Lekèlà nkwambilèku cintu kampàndà, inàbànza. Wèwè’s udi mufwànyine kwikala ànu mukezùke nè mudilamè nè mwèbè mwònsò. Udi mufwànyine kwikala wakuneemekiibwa kùdi bàyeebè, mulundà webè wa balùme, nè mwèbè mwònsò. Kàdi dìmwe dyà ku matùkù àdì panshi aa, ku Cibàsà cyà Cilumbulwidi, neùlumbululè bwà dyenda dyà masandi.

“Mémè nciyi mupiiile anyi?”

¹⁰⁸ Udi mupiiile’s! Yesù wàkamba nè: “Ewu yònsò ukàtàngidi mukàji, bwà kumwalakana mmumane kwenda nendè masandi munda mwà mwoyi wèndè.” Nènku pàdi ngènzàmpèkààtù uvwa mukutàngile mùshindù awu awu, nè mwikàle mukwelèle meeji awu, nebikengelè bwà kulumbululayè, mu Ditùkù dyà Cilumbulwidi. Kàdi wàkacyèenza bwà cinyi? Wèwè ngwakadileeja kùdiye, wenda unyòndakaja nyimà mu bilàmbà byà mùshindù kampàndà nè bintu byà mùshindù awu. Cyà bushùwà. Bidi bundù. Neùcyènzè, inàbànza.

109 Kàdi nwênù balùme bàdi nudibìikila munùdi beena Kilistò, bàvwà nè cyà kukòòkeshà nzùbu wenù abu, kàdi nulekela bakàji bèènù bènza cyôci aci, nyingàlalaayi cyanààna nzùbu wenù mujimà awu neàbutukè!

110 Nudi bafwànyine kubenga kunnanga paanyimà pàa cyôci eci, kàdi nènswambilè Bulelèlè, bwalu byanza byànyì—byànyì kabyàkwikala nè mashi pàngààfikà ku Cibàsà cyà Cilumbulwidi to. Aci's ke cintu cimwèpelè cyà bushùwà, nwamònu's. Èyowà's. Tèeleja, mwanèètù, kùdi misangu yònsò ànu dîyi dîdì dîya nè cimanyinu, nudi bamanyè's, nè mbipicìibwe nè wèwè muDyùmvwè; kí ndyànyì mèmè to, kàdi Eci ncìdì Bible mwâmbè. Ncyà bushùwà. Kaa, ndi mumanyè nè Cidi cyùmvwika cyà cyena kale, kàdi's aci ke cìdì Bible mwâmbè, nè cyôci aci ke citùdì nè cyà kwikala.

Bikèngela bwà Banjèlò bàbwikilè mpàlà yàbò, bwà kwimanabò mu Bwikadi bwà Nzambì.

111 Kàdi, nwênù bakàji, pàdì Bible mwâmbè nè: “Ncintu cìdì kacìyì cikùmbànyine to, anyì cintu cyà ciibidilu eci, bwà mukàji kusambila mene nè nsukì yèndè mikòsa.” Kènà nè bukenji bwà kusambila to, kàdi nwênù nudi numutèeka mu kòralè kàbìdì numuvwija too nè muiyishi. Ncyà bushùwà.

112 Ndi mumanyè nè aci cìdì cìnusaamisha ndambù. Kàdi, nudi bamanyè's, ànu mùvwà mààmù nè ciibidilu cyà kungambila amu, bwà dinwà dyà màfutà à mùdyàntondo nè: “Ówò kàyi makusaamishe to, kaàkukukwàcisha to.” Pa nànkù ke mùshindù wùdìbì nè Èvànjeeliyò. Bìdì bikèngela bwà kukweleshaYè meeji. M'Bulelèlè. Balùme nè bakàji, bùbìdì bwàbò, bònsò mbapiile, nseke yònsò yìbìdì, maanyì mu nkùnde nkùnde mu maanyì.

113 Ke mwaba menemene wutùdì biimànyine, kakùyì kaneemu kààbùngì, nànsha Dîyi dyôdì dyàmba cinyì. “Èè, abi's mbìmpè. Mèmè ndi ngèlè meeji nè bìdì ànu bìmpè.” Nudi nudicinkila nè mbìmpè. Bible mmwâmbè nè mbìbì! Nè *kucinkila* mbwena kwamba nè “nkudyela mu bwalu bwà njiwu kakùyì bukòòkeshi to.” Kwèna nè bukòòkeshi bwà Nzambì bwà kwenza nànkù to.

114 Maasèminère aa nè bilongelu nè bikwàbò, bìdì bìpita bintu byà mùshindù awu ebi, s'mbundù. Cìdì citèeka bansongàalùmè, bambi bàà bitende, mu njila mubì, ùbàngata bilondèshile tèòlòjì wa mùshindù kàmpàndà mukwàtakaja kùdì bantu pamutù pàa Dîyi dyà Nzambì. Kabyèna bikèmesha to mùdìbo kabàyi mwà kwitabuujà Mukenji mulelèlè wà cyà bushùwà ewu, kabyèna bikèmesha to mùdìbo kabàyi mwà kwikala nè Bintu ebi mu èkèleeziyà, kabyèna bikèmesha to mùdìbo nè cyà kuMwela pambèlu mu matùkù à ndekeelu, kakùyì kaneemu kààbùngì mu Bwikadi Bwèndè. Bwikadi Bwèndè bùdì mwà kupweka, bàdi mwà kuseka nè kudya bàzòkà, bènda banyunguluka bènza maalu à lukutukutu mùshindù wà kawùyì kumanya, kakùciyi kaneemu kààbùngì kàbìdì to ànu mùdì cintu cyanààna amu,

mu Bwikadi Bwèndè. Mpindyewu, mpindyewu kakùyi kaneemu kààbùngì to, nànsha kakesè, bwà Nzambi anyi cisàmbà Cyèndè.

115 Bwà cinyi, bwà cinyi bàdi bènza nùnkù's? Mpindyewu tèèlejàayi nè ntèmà. Bàdi bàcyènza bwà cinyi? Kí mbajingùlùle Bwikadi Bwèndè to. Kabèèna bèèla meeji nè n'Nzambi to.

116 Nudi nwela meeji nè mukàjì awu ùvwà mwà kwikala bulelèlè... anyi mùsàlaayi awu mwà kwikala muMutuutè dipi mu mpàla, nè ùvwà kwikala muMujìngìle mukùsu kwìsù nè kuMutuuta pa mutù, nè kwamba nè: "Mpindyewu Wèwè ní udi mupròfeta, twàmbilèbi nè wàKulengì awu nganyì"? Bu muntu awu mumanyè nè ùvwà n'Nzambi uvwayè ùtuuta awu, nudi nwela meeji nè ùvwà mwà kwikala mucyenze anyi? Nudikù nwela meeji nè mùsàlaayi mukwàcike maalà awu ùvwà mufwànyine kuMutùùla mwedi ku mbàngà, nè kuMutwìla matè mwìsù, nè dikòkà dyà makòdi adi nè dièla mu mpàla, bu wikala mumanyè nè awu ùvwà mufwànyine kwikala Mwànà wa Nzambi anyi? Kàvwa mumanyè cyòci aci to.

117 Nènkù leelù ewu, cidi bantu bàbùikila nè mmusùmbà wà bakoleshi bàà maalu aci, kí mbamanyè nè aci n'Nyumà Mwimpè munkaci mwà kukwàta mudimu munda mwà bantu abu to. Nènkù ànu bwà kwenza cintu kanà cyònsò eci; kùyi mucimanyè to, kùyi mumanyè Bwikadi Bwèndè to. Nudi bamanye's, ànu mùdi kasùmwìnù kàà kale kàmba... Bàmwè bàà kùdìbo bàdi bàmba nè: "Ndi nya mu disangisha bwà kuseka, nyààya mu disangisha bwà kutùùla bilèma." Batu bambè nè bakùtākàne batu benda nè bisàbaatà byà misonso muntàku mwaba wùdi Banjèlò bàciina bwà kudyata. Kabàyi bamanyè Nzambi to, ke kabingilà nkòkò aku.

118 Bwà cinyi kanùyikù bu Davìdì? Davìdì wàkamba nè: "Ntu misangu yònsò ànu mMutèèka kumpàlà kwànyì." Ke bwà cinyi yèyè wàkamba nè: "Ncyàkunyungishiibwakù to," bwalu Nzambi ùtu misangu yònsò ànu kumpàlà kwèndè. Eyowà's, mukalenge.

119 Mpindyewu, ciibìdì, Bàvwa babwikile makàsà Ààbò. Cìvwa "Bàvwa babwikile makàsà ààbò," aci cyùmvwija cinyi? Didìpwekesha. Babwikile kwìsù Kwàbò cìvwa cyùmvwija nè kaneemu kààbùngì mu Bwikadi bwà Nzambi, babwikile makàsà Ààbò cìvwa didìpwekesha mu Bwikadi Bwèndè.

120 Ànu bu Mòsà mu Bwikadi Bwèndè, ùvùùla bisàbaatà byèndè, ùbuulula makàsà èndè.

121 Pòlò pàakasanganàye Yesù, Dikunji dyà Kapyà, wàkadishinda panshì, kacyi mwimànyine pa makàsà èndè to. Ùvwà nè mpàla wèndè, mwaba wùvwà makàsà èndè nè cyà kwikala, didìpwekesha.

122 Yone Mubàtiiji, mupròfeta munène awu, wakumpàla bwà kwikala pa buloba mu bidimu nkàmà yinaayi, kàdi yèyè kwamba nè: "Ncyènà mukùmbàne bwà kulenga makàsà Èndè to, bwà kusùùlula nshinga wa sàndalà Wèndè to."

¹²³ Nwamònu's, ewu uvwa ku makàsà èndè awu, mabwikila, cìvwa cyùmvwija didipwekesha. Tàngilàayi musadidi ewu mpindyewu kumpàlà kwà Nzambi: mpàlà Wendè mubwikila mu kaneemu kààbùngì, makàsà Èndè mabwikila mu didipwekesha, èyowà's, nè mumanyè ànu menemene byà... Ikàlà mumanyè menemene bukesè bwèbè.

¹²⁴ Twètù bònsò tudi tuteeta kwikala kampàndà wa munène. "Mémè's ki Docteur *Kampàndà*, munene *Kansanga* wa Kampàndà." Wèwè kwèna nè cyùdì to. Ncyà bushùwà. Aci's cidi ànu... Kwèna cintu nànsha cìmwè to. Wèwè muswè kumanya mùshindù wùdì munène, ela munu wèbè mu dijiba dyà màyi nè ùwùpàtùlè, kàdi ùpetululè disòsù mwaba wùvwà mwelè munu awu. Nwamònu anyi? Kapèèna cintu nànsha cìmwè to. Nènkù ke citùdì twètù ncyòci aci. Nzambi ùdì mwà kwenza twètù katùyikù to, kàdi katwèna mwà kwenza cintu Yèyè kàyikù to. Wèwè udi nganyi? Nwamònu anyi?

¹²⁵ Ikàlà mumanyè mùshindù wùdì mukesè. Njila wa muulu nkupweka. "Ewu udi udìpwekesha neàbandishiibwè; ewu udi udibàndisha neàpwekeshiibwè."

¹²⁶ Ànu àbìdì àdì panshi aa mvwa mubiikidiibwe ku Chicago, kùdì kasùmbù kàà bansantu, bwà kwakula. Mwambi kampàndà munène wa beena Mpenta kuntwaku mwikàlè nè màpòlomè matwè ku ànaayi à mu tùlaasà tutùmbùke, nè bikwàbò, nè ewu kàvwa muswè mùshindù wànyì mukesè wà kwakula wà muntu mupyamùpyà kuntwaku kumpàlà kwà nsangilu munène uvwabò mwà kwikala nendè, pa nànkù yèyè ùvwà nè muntu kampàndà wa mu cilongelu cinène cyà Bible kuntwaku, bwà kulwayè, cilongelu cinène cyà Bible cyà mu Chicago aci, bwà kwakulayè. Nènkù muntu awu kwambayè nè mpindyewu cidiye mufwànyine kwenza: "Nkuya kuntwaku nè kupeetula bantu abu, bwà cintu cyònsò cìvwàye mwà kwelela meeji, bwà mùvwàbo bapiile pa kwitabuujà nè kùvwà Nyumà Mwìmpè nè bintu byònsò byà mùshindù awu," kumpàlà kwà beena Mpenta. Kubàndayè kuntwaku nè cyàdì citàdika, nè—nè nshìngù wa nkoolò mukùdimuna, bu muvwàle nkooci wa tuxedo, kwadijayè tuntu twèndè twònsò tùvwàye mufùnde pa cibùmbà cyà ku cyambilu apu. Yèyè ùkaavwa mumanè kucilongolola bìmpè mu mùshindù wà nè ùvwà ànu mwà kuumvwija Bible, nè Nzambi kàyi mumanyè kantu nànsha kàmwè pa Cyòci aci to.

¹²⁷ Kàdi katanci aka, nwènu... Yèyè kumòna nè kabyàkapetangana nè bantu abu to. Kutùngunukayè nè kwambva cikwàbò cintu mùshindù awu, nè bààkashàla ànu batàngilàngàne muntu nè mukwèndè. Kacyàkapetangana nè bantu bàà mùshindù awu to, beena Mpenta abu. Pa nànkù paanyimà pàà katanci wàkamòna nè ùvwà mucimùnyiiibwe, è kwambulayè bintàkanyì byèndè kubyela mu dyàpà, kuumukayè pa cibùmbà cyà ku cyambilu, nè mutù wèndè mwìnyika, wènda mwìnàme. Munsantu kampàndà mununu musòmbe ku cimanu,

kwambayè nè: “Bu wikalakù nànsha mubànde mùshindù wùvwàye mutùùlùke ewu, nùnkù’s mmutùùlùke mùshindù wùvwàye mubànde awu.” Nènku’s ke mùshindù awu wùdìbì, kàbìdì.

128 Dìpwekèshè, ùmonè mùdì mwà kwikala mukesè; kî ncyûdì mumanyè to, ncyûdì kùyì mumanyè aci. Dìpwekèshè wêwè mwinè kumpàlà kwà Nzambì.

Mpindyewu tudi tusangana, ciisâtù nè, Yêyè ùvwa mwà kubùùka nè mapwâpwà makwàbò àbìdì awu.

129 Mpindyewu tàngilàayi, dyàmbedi, Yêyè, mu Bwikadi bwà Nzambì, Ùvwa nè kaneemu, nè mpàla Wendè mubwikila. Ciibidì, Yêyè ùvwa mudìpwekèshe kumpàlà kwà Nzambì, nè makàsà Èndè mabwikila. Nè mapwâpwà Èndè àbìdì àdì àlondà awu, Ùvwa mwà kubùùka, kuMutèèka mu mudimu. Kaa, ekèlekèlè!

130 Cìvwa Nzambì munkaci mwà kwenza ncinyi? Ùvwa munkaci mwà kuleeja mupròfetà mùvwà musadidi Wendè mulongolola nè cyà kwikala. Nzambì ùvwa ùleeja nè: “Aba mbasadidi Bàànyì. Aba m’Bàànyì. Tàngilàayi mùdìbo badìlongòlòlè; bàà kaneemu kààbùngì, badìpwekèshe, nè mu mudimu.” Mùshindù awu ngùdì basadidi bàà Nzambì. Kaa, ekèlekèlè!

131 Mùshindù awu ngùvwàbì bikèngela bwà twètù kwikala: nè kaneemu kààbùngì ku Dìyì dyà Nzambì, badìpwekèshe, nè mu mudimu bwà Nzambì.

132 Bu mukàjì awu pààkabiikidiibwàye bwà kwenza cyenzedi, wàkalwa, pààkambàye nè: “Lwâyì, kanùmonàayi Muntu Udi mungambìlè bîndì mwênzè.”

133 Cimanyinu cyèndè cìvwa cimwenzèje, bwà nè Yêyè nguvwa Maasiyà awu. Yêyè nè: “Mukalenge, tudi bamanyè nè, pààlwà Maasiyà. . . Mpindyewu, Wêwè udi nè cyà kwikala mupròfetà. Tudi bamanyè nè, pààlwà Maasiyà, Yêyè ke watwàmbila maalu aa.”

134 Nwamònu’s, yêyè ùvwa mutèkèmène bwà kwambaYè nè: “Èè, Maasiyà ùlwalwa kàtàatakà; Mèmè ndi ànu mMudyanjidila Yêyè cyanàànà.” Kàdì Yêyè kwamba nè: “Mèmè’s ke Yêyè awu.”

135 Cyôci cyàkamubweja mu cyenzedi ànu mpindyewu. Wàkaditwa mu cyenzedi. Kùvwa mwà kumwimanyika to. Cìvwa ànu bu nzùbu mukwàte kapyà, ànu bu mùmwà mwambè dilòdòlò adi, mu cipeepèlè cìkolè. Kanùvwa mwà kumwimanyika to. Yêyè kupweka mu cimenga amu nè: “Lwâyì, kanùmonàayi Muntu Udi mungambìlè bintu bîndì mwênzè. Ewu kî m’Maasiyà awu anyi?” Nwamònu anyi? Yêyè’s wàkaditwa mu mudimu.

Cyàkenzàye ncinyi? Wàkajuuka, dyàmbedi, wàkadipwekesha.

“Ntwàdìlèku màyi à kunwà.”

136 Yèyè nè: “Mòna’s, baatatwètù’s bààkanwà ku ciinà eci,” nè bikwàbò. Ke—ke yèyè. . .

137 Yèyè nè: “Èè, nènkupèèshè Mâyì à kunwà; bwà kwikadi ulwa apa to.”

Yèyè nè: “Mukalenge, Mukalenge, mpèèshèku Mâyì awu.”

138 Nwamònu’s, ùvwa mudipwekèshe pa bwalu abu. Nènkupààkadipwekeshàye, dībà adi Yesù wàkamuleeja cimanyinu cyà Maasiyà, nè cyôci aci cyàkamubweja mu cyenzedi. Ùkaavwa pabwìpì nè kuya dībà adi, ùkaavwa mudilongòlòle bwà kwambila muntu yònsò uwayè ùtwilangana nendè awu. Nwamònu anyi?

139 Mu bushùwà bwà bwalu, bilondèshile bilèlè byà ditùnga dyà ku Esètè abi, bantu abu kabàvwa mwà kwikala batèèlèje mukàjì awu to. Mukàjì wa bwena awu kèna nè dīyì munkaci mwà bantu to. Kèna naadi to nànsha kakesè. Kèna mwà kwambakù cintu nànsha cìmwè to. Kàdi wèwè udi uteeta kumwimanyika anyi? Yèyè’s ùvwa muditwe mu cyenzedi. Byàkakèngela bwà kwambilayè muntu kampàndà nè: “Lwàkù kùnu ùdimwènè wèwè mwinè. Muntu awu mmungambile ànu cìmvwà mwenze. Ki ng’aci citùvwà bindile anyi? Aci kī ncidi Mufundu wamba, nè Maasiyà, pàalwàYe, Yèyè neènzè cyôci eci anyi?” Mukàjì awu wàkaditwa mu cyenzedi bwalu wàkadipwekesha, ke Nzambi kubwela munda mwèndè.

140 Peetèlò, pààkangatàye Dīyì Dyèndè. Pààkeelàye makòndò bufùkù bujimà, bu mùvwàye mulòbi kuntwaku, ke kubwelayè, mutekète mu mabòko, kàyì nè mushipa nànsha. Mulòbi mwìmpè kanà yònsò ewu mmumanyè cidi bwalu abu, kàyì nè mishipa to. Dībà adi, cyàkumpàla, ùvwa musukùle makòndò èndè, muadije ku mwelelu wà musùlu, nè ùvwà ùànyika.

141 Ke Yesù kupweka nè kulòmba bwà kusomba bwàtù bwèndè. Yèyè kuyiisha. Pashìishe kwambaYè nè: “Simonà, ndààku uàkùpè mu ndòndò wa màyi ùpwekeshè bukòndò bwà kukòka. Alùkilà ànu mwaba wùvwà mwelè bukòndò awu, bufùkù bujimà awu. Alùkilà ànu mwaba wùvwà mwenzè mudimu mukolè, ku dībà nè ku dībà awu, nè pwekeshà bukòndò bwà dikwàta dyà mishipa yàbùngì, bwà dikwàta dinène.”

142 Mpindyewu mònaayi. Yèyè nè: “Mukalenge, tuvwa bakwàte mudimu mukolè bufùkù bujimà katwèna bakwàte cintu nànsha cìmwè. Kàdi ku Dīyì Dyèbè, Mukalenge, nèmpwekeshè bukòndò. Ku Dīyì Dyèbè!” Ke cyôci aci, kukwàcila Nzambi ku Dīyì Dyèndè. Nènkupààkapwekeshàye bukòndò, wàkakwàta mushikì munène wà mishipa mu mùshindù wà nè nànsha bukòndò mene bùkaavwa bwàmba kupandika.

143 Aci kàdi kumubweja mu cyenzedi. Èyowà’s, mukalenge. Bwenzeji bwà Yesù pambidi pèndè kumubweja mu cyenzedi, nè yèyè kumacisha bukòndò. Ki Yesù kwamba nè: “Kùcìnyi to, kubangila ku leelù nèukwatè bantu.”

144 Mpofo awu, pàakondopiibwàye, musòmbé ku ciibi cyà lupangu nè... anyi musòmbé mu mùsèsù. Kàdi Bàfaalèsà kwambabò nè: “Muntu kanà yònsò ewu uvwa uMujikula, anyi uvwa nè cyà dyenza nè Yesù, uvwa mwà kwipaciibwa mu ntempèlù.”

145 Bòbò, bàakalwa, kukonkabò taatù nè maamù. Kwambabò nè: “Yèyè ùkaadi muntu mukolè; mukonkàayi.”

Yèyè kwamba nè: “Muntu, udibò bààbiikila Yesù, mmungondòpa.”

146 Bòbò nè: “Muntu ewu nngènzàmpèkàatù. Kàtu wa mu bisumbù byètù to. Katwèna bamanyè kùdiYe mufùmine to. Pèèsha Nzambi butumbi's wè!”

147 Yèyè nè: “Mpindyewu, bwà nè Yèyè nngènzàmpèkàatù anyi to, mèmè ncyèna mumanyè to.” Yèyè nè: “Kàdi cintu cìmwèpelè cìndi mumanyè bushùwà; ncyà nè mvwa mpofo, ndi mpindyewu mwà kumòna.” Ke yèyè nè: “Cintu cyà pabwàci cidi nè, bwànyi mèmè, nwènù nudi nè cyà kwikala balombodi bàà nyumà bàà díbà edi, nènku Muntu ewu mmuntàbèje mèsù, kàdi nwènù kanùyì ànu bamanyè kùdiYe mufùmine to.” Cyàkenzàye ncinyi? Wàkaditwa mu cyenzedi. Ncyà bushùwà. Cyàkamubweja mu cyenzedi, bwalu wàkatangalaja luumù Lwèndè mu ditunga dijimà.

148 Bantu, mu Ditùkù dyà Mpenta, pàakabàmbilà Yesù bwà kwindilabò kuulu aku, nènku bàvwa mwà kwikala... Kupweka, nè pàakapwekà Nyumà Mwimpè pambidi pàabò mu Ditùkù dyà Mpenta, pàvwàbo bapetè bwenzeji kùdi Dìyi dyà Nzambi dimwèneshiibwe. Mpindyewu vùlukàayi nè, Yesù wàkamba nè: “Indilaayi ku Yelusàlèma too nè panwàlwàcijiibwà nè Bukolè bwà ku Dyulu.” Bàakindila, kí mmatùkù mwandamukùlù to, kí mmatùkù citèemà to; bàakindila munda mwà matùkù dikùmi, too nè pàakamwèneshiibwà mulayi. Nè Nyumà Mwimpè wàkapweka nè kuDitàpulula, nè ndimì yà Kapyà yàkasòmba pamutù pàà yònsò wa kùdibo.

149 Nè pàvwàbo bapetè bwenzeji bwà Nyumà Mwimpè apu, bàakaditwa mu cyenzedi, bènda bàtètuka bu bantu bakwàcike maala, bèèla mbilà mikolè, bàakula mu myakulu, bàpàtuka mu mùsèsù bàya.

Bàakamba nè: “Bantu aba mbùle tètè nè mvinyò mupyamùpyà.”

150 Yèyè, Peetèlò, kujuukayè, è kwamba nè: “Eci ncyàkambàbo kùdi mupròfetà, Yowèlà nè: ‘Nebyènzèkè mu matùkù à ndekeelu.’” Cyàkenza cinyi? Cyàkamubweja mu cyenzedi.

151 NeÀkubwejè mu cyenzedi, pawikalà kùyì muMupetè to, neÀkubwejè mu cyenzedi paùdi umòna Dìyi dyà Nzambi dyùle. Citùdi bamòne mu matùkù à ndekeelu aa, s'bivwa bikèngela kutùbwejaci mu cyenzedi. Bivwa bikèngela kucyènzaci, bu twètù

ànu mwà kucyènza nè kaneemu kààbúngi nè didìpwekesha. Dikunji dyà Kapyà kumpàlà kwà Pòlò, dyàkamubweja mu cyenzi. Nènkù leelù ewu patùdì tumòna Dikunji dyà Kapyà dimwèdimwè adi, ku maalu a mamanya, ku bipeta Byàdi, ku cyàkalayàDi aci, wènza nè Dìyì mu matùkù à ndekeelu aa dyènzekè ànu menemene, bìvwa bìkèngela kutùbwejadi mu cyenzi. Bwà nè, cimanyinu cyàkafidiibwa nè: “Ànu mwàkadibi mu matùkù à Sodomà, pabwipi menemene nè Sodomà kwoshiibwayè, ke mwikalàbi kàbidi ku dilwa dyà Mwànà wa muntu; Yèyè neàmweneshiibwè cyàkàbidi, umweumwe awu makèèlèlè, leelù, too nè kashidi.” Bìvwa bìkèngela bwà kubwejaci cidimba cyònsò cyà Mubidi wà Kilistò mu cyenzi, kubwejamù cintu cyònsò cinùdi mwà kubweja aci, bwalu edi ndibà dyà ndekeelu, ndibiikila dyà ndekeelu, dibibiikila dyà ndekeelu. Ku mwàkù nè ku mwàkù, nDyùjiibwe. Dìvwa nè cyà kutùtèeka mu cyenzi.

¹⁵² Twètù, ànu bu mupròfètà, tudi bamòne bipeta byà màngumba àdi àdizànjika mùdiwu àjìmiya mwaba wàwù mu Kilistò, bàjìmiya dikwàtà dyàbò ku Dìyì Dyèndè, bìtabuuja twitabàayi. Nè tudi bamòne cyàkabènzekelà pààkenzàbù cyòci aci, bààkafwà mu nyumà. Tudi tumòna cyàkenzekelà ba-Luthériens pààkabèngàbò dibibiikila dyà Wesley. Tudi tumòna cyàkenzekelà ba-Méthodistes pààkabèngàbò dibibiikila dyà beena Mpenta. Mpindyewu bìshi bwà beena Mpenta? Nwamònu anyi?

¹⁵³ Tudi bamòne muntu mudibàndishi, mùshindù ùvwà Uziyà awu, wàkateeta kwangata kaaba kàà mudimu mwela maanyi awu. Mudimu wa muntu mu èkèleeziyà mmulaaba maanyi, kî mmufila to. Mmulaaba maanyi. Èkèleeziyà, kùdi...mpaasàtà, mutangadiki, mupròfètà, mùpostòlò, cidi nè cyà kwikala mudimu mwela maanyi wà Nzambi, kawùyi musungula kùdi muntu to. Muntu wàkateeta kwelela mudimu awu kakàndà musangu kampàndà, bààkeela nshòòbò bwàwù; mukwàcikwètù Maatiyà mukwàte nè byà luse awu kààkenzakù cintu nànsha cimwè to, kàdi Nzambi wàkasungula Pòlò nè wàkenza cintu kampàndà bwalu ùvwa mwela maanyi. Nènkù tudi tumòna biimikila majitu aba bateeta kwamba nè: “Ewu mmwèpiskòpò wa cijila *kampàndà*, ewu mmunène wa mbùlāmàtadi *kampàndà*, ewu yèyè’s *mmuntu* kampàndà,” kacya kacitu nè kuyaayàci to. Kàdi pàdi Nzambi ùbwela nè wàngata bukòòkeshi, dībà adi tudi tumòna dilaabiibwa dyà Nyumà Mwimpè dīshindika Dìyì dyà Nzambi.

¹⁵⁴ Mpindyewu, bwenzeji bwà cikèèna-kumòna pa mupròfètà awu, cyàkenzelàbò muntu uvwa mulediibwe mupròfètà ewu ncinyi? Vùlukàayi nè, yèyè wàkafùnda Bible mujimà. Kùdi Mikàndà makùmi àsambòmbò nè yìsambòmbò yà Yeshàayi, nè Mikàndà makùmi àsambòmbò nè yìsambòmbò yà Bible. Ùdi ùbanga, bu mu Genèsè; munkacinkaci mwà Mukàndà mùlwalwa Dipungila Dipyadiyà, Yone Mubàtiiji; nè ùdi ùjikijila mu

Bukalenge bwà bidimu cinunu. Mupròfeta munène, umwe wa ku baprófeta bàà batámbe bunène bàà kacya twápeta, ùvwa n'Yeshàayi, nè yéyè wàkalediibwa bwà kwikala muprófeta.

¹⁵⁵ Kàdi pààkiimanàye mu Bwikadi bwà Nzambi, cyàkafikisha muprófeta awu ku dyenza cinyi? Muprófeta wákamba nè: “Dyàkabi dyanyi, bwalu ndi muntu wa mishikù mibiipe.” Bwà kubwela mu Bwikadi bwà Nzambi, nè kumòna dibùngù dilaaba bulelèlè dyà Nzambi, cyàkafikisha muprófeta ku ditonda nè yéyè ùvwa ngènzàmpèkààtù. Cívwa nè cyà kutwènzela mùshindù awu, Bùvwa bùkèngela kwenzabò nànkù, Bwikadi bulaaba bwà Nzambi abu's. Pààkamònàye Kampàndà awu wèla lubilà, nè makunji ànyúkuka, nè Banjèlò aba bàtwa kumpàlà bàtwa paanyimà, biikàle bàjaadika nè Bàvwa kumpàlà kwà Nzambi, nè Bàvwa basadidi bàà Nzambi, balaaba maanyi, nè Bàvwa bèèla mbilà mikolè; yéyè ùvwa ngènzàmpèkààtù.

¹⁵⁶ Cyàkenzekà ncinyi díbà adi pàvwàye mudilongòlòle apu? Mpindyewu tèelejàayi, bwà kujikija, ùvwa pabwipi bwà kutonda nè ùvwa ngènzàmpèkààtù nè: “Dyàkabi dyanyi, bwalu ndi muntu wa mishikù mibiipe, nè ndi musòmbèle munkaci mwà bantu bàà mishikù mibiipe. Dyàkabi dyanyi!” Pashiishe Mwanjèlò kwangata lukwàtù nè kwangata dikalà dyà ku cyoshelu, kudikwàta mu byanza Byèndè, nè kulwa kumusukula naadi. Pashiishe kulwakù dikezudiibwa, paanyimà pàà ditonda dyèndè.

¹⁵⁷ Mpindyewu piikalà muprófeta, yéyè mubiikidiibwe, mushindikiibwe bwà kwikala muprófeta wa Nzambi, mu Bwikadi bwà Nzambi, pa kumòna bukesè bwèndè abu, ùvwa mudilongolole bwà kutonda nè yéyè ùvwa ngènzàmpèkààtù, ncinyi cívwa cikèngela bwà wèwè nè mèmè kwenza? Kàdi nudi bamanyè citùdi twenza anyi? Tukùpa mutù wètù tupàtuka tuya twenda tuseeka. Ke mwaba wutùdi biimàne awu, too nè pààlwà dikezudiibwa. Tàngilàayi, Yeshàayi . . .

¹⁵⁸ Ndi muswè bwà numòne cingà cintu. Nzambi kàakakwàta mudimu nè mikàndà nè tèolòji, myàkù yà tèolòji, bwà kukezula musadidi Wendè to. Wàkakwàta mudimu nè Kapyà. Yéyè kàakakwàtakù mudimu nè twitabàayi bwà kukezula musadidi Wendè to. Wàkangacila Kapyà pa cyoshelu. Nènku piikalàbi nè Nzambi ùkaadikù mukezule muntu leelù ewu, bikèngela ciikalè Kapyà kàà Nyumà Mwimpè kàdi kàkezula muntu; kî nkubala mukàndà nè kwenza *cikampàndà*, anyi mukàndà mukwàbò mufunda kùdi *kansanga* to.

¹⁵⁹ Mwambi kampàndà munène mu Californie emu kwambayè, ditùkù adi nè, ùvwa nè “mukàndà wà cidimu.” Mèmè ndi mpangakana nendè. Mukàndà wà cidimu m'Bible, ke mùtùbi misangu yònsò. Mukàndà wà cidimu m'Mukàndà wà Nzambi, misangu yònsò.

¹⁶⁰ Nènku Nzambi wàkakwàta mudimu nè Kapyà bwà kukezula musadidi Wendè. Pashiishe cyàkalondà, paanyimà pàà yéye mumanè kutonda nè didipwekesha dyônsò nè ùvwa mupîile, ke dibà adi dikezudiibwa kulwadi; nènku paanyimà pàà dikezudiibwa, pashiishe kulwakù dimutùma nè mudimu. Nwamònu's, ke lutàtù lùdiku ndwòlò alu, bàmwè bàà kutùdi bàdi bàteeta bwà kutumiibwa nè mudimu kumpàlà kwà twètù kukezudiibwa. Nwamònu anyi? Netwámbe nè: “Èè, néndondè *cikampàndà*.” Bikèngela tùlondè Nzambi. Banjèlò abu bààkenza cintu cimwèpelè, bàvwa basòmbe mu Bwikadi bwà Nzambi; badipwekèshe, mu kaneemu kààbúngì, nè mu cyenzedi kumpàlà kwà Nzambi. Pashiishe civwà cìlonda, mudimu mumutùma naawù; paanyimà pàà ditonda nè dikezudiibwa, divwa ndîbà adi dyàkeelà Yeshàayi mukezùke awu lubilà nè: “Mmémè ewu; ntùmaaku.”

¹⁶¹ Kaa, mwanèètù wa balùme, mwanèètù wa bakàjì, bu nè kùvwakù cikondo civwà baaYeshàayi nè cyà kupweka ku nzùbu wa Nzambi bwà kukezudiibwa! Bu nè kùvwakù cikondo civwà cidimba cyà èkéleeziyà nè cyà kulwa bulelèlè nè kutonda mpèkaatù yèndè! Pìikalàku kùvwakù cikondo kampàndà bwà muntu mutwè cimpìngà!

¹⁶² Anjì elàayiibì ànu meeji, mu bufùkù bwàkooshiibwà Sodomà abu, ndi ndìkonka nè mbantu búngì kaayi bààkayà kule nè mukenji wa Banjèlò abu? Ndi ndìkonka nè mbantu búngì kaayi bàvwa kabàyi batàmba kucyùka bwà kuumvwa dīyī Dyàbò? Nè bààkabùtuka dilòòlò dimwèdimwè adi, nè kabààkwikalakù kàbìdì to, ànu dinyooka dyàbò mu ifèrnò.

¹⁶³ “Ànu mwàkadibi mu matùkù à Noà.” Mbanu búngì kaayi bààkamusekà nè kumwelulwila, nè balwè kuntwaku ànu bwà kutèeleja dyèndè, bàmba nè: “Netùbande bwà kutèeleja mukùlumpè wa cimfiikààmùndà awu cyàkàbìdì, ànu bwà kumwelulwila.” Bàjuuka, bàkwàta njila bàya, kabàyikù nànsha bafwànyine kumutèeleja ùyiisha to. Bintu byà mishindù yònsò; nè bààkabùtuka mu manyooka àvwàye munkaci mwà kuyiisha awu.

¹⁶⁴ Amòsà, muiyishi mukese awu, kabàyi bamanyè. . . kùvwàye ùfùmina to, mupròfetà kampàndà, nè dilaabiibwa, kuseemenayè nè kupwekesha mèsù mu Sàmaalèyà musangu awu. Mutù wèndè nè dibàla awu ùbàlakana, mwedi wèndè wà kale wà mvya awu, pàvwàye wènda ùbànda ùfùmina dyàmwàmwà dyà kakùnà aku apu. Wàkapwekesha mèsù panshì, mèsù èndè à cijila awu makèèpesha pàakatàngilàye pa cimenga aci, kabiyi bu babandidi bàdi bafùmine pa buloba bujimà to. Bwalu, baakwidì, bònsò bwàbù, bàvwa benze mpèkaatù, nè bapròfetà bàà mashimi bàvwa bàbàmbila nè bìvwa ànu bìmpè. Wàkapweka kuntwaku kàyi nè dimwela dyà mu dibòko bwà ditàbuluja dyèndè to. Wàkapweka kuntwaku kàyi kantu nànsha kàmwè to, wèla mbilà

mikolè. Ke yêyè nè: “Nzambi mwinè, unùdi nulàka mukana nwamba munùdi nukwàcila mudimu awu, ngwanùbùtula.”

¹⁶⁵ Nènku ndi ngàmba nè EMU MMÙDÌ MUKALENGE WÀMBA: Nzambi, udi Àmèrikè wàmba nè ngudiyè ùkwàcila mudimu awu, ke wàmubùtulà. Nwênù angàtaayi aci mwônsò munùdi baswè amu. Cìdì citùkèngelà, nkupweka ku cyoshelu eku, bu Yeshààyi. [Katùpà kàà mukàbà wà mèyi munda mutupù—Muf.]

Ke Nzambi kwamba nè: “Wàyà kaaba Kàànyì nganyì?”

¹⁶⁶ Yeshààyi wàkamba nè: “Mmémè ewu; ntùmaaku.” Ndi ngèèla meeji ku musambu awu wà nè:

Pààkalengabo mupròfetà kùdi dikalà dyà
Kapyà,
Dìmuwija mukezùke ànu nè mwèndè
mwônsò,
Pààkambà Dìyì dyà Nzambi nè: “Wàyà kaaba
kèètù nganyì?”
Dìbà adi kwandamunayè nè: “Mfùmù, mmémè
ewu, ntùmaaku.”

¹⁶⁷ Dyàmbedi byàkakèngela bwà kudipwekesha nè kukezudiibwa, nè kudìlongolola mutùdi bamòne musadidi mulongolola awu. Tàngilàayi Uzìyà mùvwàye mulongolola amu, kàdi's wàkapangila. Kanùteeki. . .

¹⁶⁸ Wèwè udi wamba nè: “Èè, mpindyewu, mèmè's ndi mumanyè nè Docteur *Kampàndà's* mmuntu mwìmpè. Mèmè's ndi mumanyè Mwanèètù *Kansanga*.” Mbafwànyine kwikala nànkù, kàdi kanùtàngidi aci to.

¹⁶⁹ Bandulukàayi *kunweku*, nwamònu's, s'ke Njila ewu. Nzambi udi nè Mùshindù wà kulongolola. Wàkacyènza bìshi? Mu Ditùkù dyà Mpenta, Peetèlò wàkabàmbila cyà dyenza. Wàkabàfùndila mukàndà wà bwanga, nè wùtu mushààle ànu wùmèwùmwe awu. Kùwùnyangàkàjiku to, nèushipè mubèedi webè awu.

Bóbò nè: “Tudi mwà kwenza cinyì bwà kusùngidiibwa?”

¹⁷⁰ Yèyè nè: “Nyingalàlaayi, muntu nè muntu wa kunùdi, nùbatijiiibwè mu Dìnà dyà Yèsù Kìlistò bwà dilekelediibwa dyà mpèkaatù, nènku nenùpetè kupà kwà Nyumà Mwìmpè. Bwalu mulayì wùdi kunùdi, nè kùdi bânà bèènù balela, nè kùdi aba bàdì kule, mu bùngi bwônsò bwàbìikilàbò kùdi Mukalenge Nzambi wetù abu.”

¹⁷¹ Aci's ncyôci eci mwab'ewu mene dilòlòlò edi. Pìikalà Nzambi muciiikàle ànu ùbìikila, s'ke kabèjì kàà bwanga nkòkò aku. Udi ànu mwà kutùngunuka nè kwakidila Nyumà Mwìmpè umweumwe wàkapetabò kwàka awu, ànu . . . Udi mwà kwakidila cintu cìmwècìmwè aci dilòlòlò edi. Londà wèwè ànu cyanàànà. Ke cyônsò cyùdi wenza. Èyowà, dìbà adi udi mwà kwamba nè:

Pààkalengabo mupròfeta kùdì dikàlà dyà
 Kapyà,
 Dìmuvwija mukezùke ànu nè mwèndè
 mwònsò,
 Pààkambà Dīyī dyà Nzambì nè: “Wâyà kaaba
 kèètù nganyì?”
 Pashiishe kwandamunayè nè: “Mfùmù,
 mmémè ewu, ntùmaaku.”

Tùwĩmbààyi's.

Akùlà, Mukalenge wanyì, akùlà, Mukalenge
 wanyì,
 Akùlà, nè mèmè nêngìikalè nè lùkàsà bwà
 kuKwandamuna;
 Akùlà, Mukalenge wanyì, akùlà, Mukalenge
 wanyì,
 Akùlà, nè mèmè nêngàdamunè nè:
 “Mukalenge, ntùmaaku.”

¹⁷² Tèèlejààku kùnu's, mwanèètù.

Kùdì mìliyô mpindyewu mu mpèkaatù nè
 bundù, munkaci mwà kupùnga nè lufù,
 Kaa, tèèlejà lubilà lwàbò lwà dibungama nè
 kànjaabàla;
 Kolèshàku, mwanèètù, kolèshàku ùye
 kabàsùngila;
 Mpindyewu andàmùnàku nè lùkàsà lwònsò nè:
 “Mfùmù, mmémè ewu.”

Kaa, akùlà, Mukalenge wanyì, akùlà,
 Mukalenge wanyì,
 Akùlà, nè mèmè nêngìikalè nè lùkàsà bwà
 kuKwandamuna;
 Kaa, akùlà, Mukalenge wanyì, akùlà,
 Mukalenge wanyì,
 Akùlà, nè mèmè nêngàdamunè nè:
 “Mukalenge, ntùmaaku.”

¹⁷³ Twìnyikàayi mitù yètù. [Mwanèètù Branham ùdì wimbila
 mu matàma *Akùlà, Mukalenge Wanyì*—Muf.]

Dìmuvwija mukezùke ànu nè mwèndè
 mwònsò,
 Pààkambà Dīyī dyà Nzambì nè: “Wâyà kaaba
 kèètù nganyì?”
 Pashiishe kwandamunayè nè: “Mfùmù,
 mmémè ewu, ntùmaaku.”

Udikù muswè kwikala mudipwekèshe nè mukezùdìibwe
 anyì?

Akùlà, Mukalenge wanyì, akùlà, Mukalenge
 wanyì,

Akùlà, nè mèmè nêngiikalè nè lùkàsà bwà
 kuKwandamuna;
 Akùlà, Mukalenge wanyì, akùlà, Mukalenge
 wanyì,
 Akùlà, nè mèmè nêngàdamunè nè:
 “Mukalenge, ntùmaaku.”

174 Pàdìbo munkaci mwà kwimba mpindyewu apa, kùdikù Yeshàayi kampàndà kaaba aka dilòlò edi, anyì lukàmà, udi muswè kuya awu, muswè dikezudiibwa dyà Nzambi mu nsòmbelu webè anyì? Nwènù bàdì kabàyi bamanyè Kilistò bu Musungidi wenù abu, nudi babiikidiibwe mpindyewu ku cyoshelu, piikalàYe wàkula nè mwoyi wenù. Ncyèna mutàmbe kunànukila mu diswishisha to. Ndi ngèla meeji nè Nyumà Mwîmpè Yèyè mwinè ke udi utwishisha. Kàdi pawìkalà kaaba aka, nè kùyì nè Kilistò to... Mpindyewu vùlukà nè, wèwè newàdamunè ku Ditùkù dyà Cilumbulwidi, bwà cyùdi wenza nè cyôci eci dilòlò edi. Nwamònu anyì? Mpindyewu wèwè muswè kulwa, ndi kaaba aka bwà kusambilakù pàmwè neebè.

175 Mu Dîna dyà Kilistò, ndi nkupèesha mpungà wa wèwè kulwa, kukèba Nzambi, nè disànkà dyònsò udi mufwànyine kuMupeta. Bansongà, bantu banunu, bashindàme, bidimba byà èkèleeziyà, nànsha wèwè mwikàle nganyì; piikalà Kapyà kàà Nzambi, ku Nyumà Mwîmpè, kakàyi kakukezùle munda mwà mwoyi wèbè to, too nè mwaba wùdi witabuujà Dîyi dyònsò dyà Bible ewu, nè Kilistò mwikàle ntèmù udi nè mwoyi wa wèbè... mu mwoyi wèbè, nè Yèyè mmubiishiiibwe ku bafwè, dîbà adi ndi nkubiikila ku cyoshelu. Lwàkù apa tusambilè pàmwè neebè. Ndi ngiitabuujà nè bònsò bwènù, dîbà adi, bilondèshila cyenzedi cyènù, nè nudi basungidiibwe.

176 Dîbà adi, kùdikù muntu mutwè cimpingà mwab'ewu udi muswè kulwa anyì? Ndi nkulòmba, bu musadidi wa Kilistò nè, bu wèwè mwà kupweka mwab'ewu bwà túsambilè neebè. Ncyèna ngàmba nè neÀkwalùjè to; ndi ngiitabuujà nè neÀkwalùjè. Kwèna muswè kulwa bwà kuciteeta mpindyewu anyì? PiikalàYe uyiiikila neebè, lwàkù.

177 Aba bàdì kabàyi nè dibàtiiza dyà Nyumà Mwîmpè abu? Ndi ncinkila nè kakwèna muntu nànsha umwe kaaba aka udi kàyì, udi mutwè cimpingà to. Bantu bònsò, dîbà adi, bàdì nè cyà kwikala badilame mu disambila; biikàle beena Kilistò, nè badilame mu disambila. Nènku pawìkale mudilame mu disambila, kàdi kùyì mupetè dibàtiiza to, nè wèwè muswè bwà Nzambi kukupèeshaDì, ke webè mpungà dîbà edi, mpindyewu.

178 Kùdi muntu mulùme umwe mwab'ewu udi kàyì Nendè to. Mwoyi wèndè mupwekèle ùbèneshiiibwè. Ndi ngèla meeji nè n'Yeshàyi mukwàbò.

Mpindyewu bàndululàayi mitù yènù dîbà adi.

179 Kùdi muntu umwèpelè udi mwinàme mwab'ewu ku cyoshelu eku, umwe ûndi ngèèla meeji nè n'Yeshàayi.

Mpindyewu Yèyè ùdi kaaba aka. Nudi nwitabuuja nè Yèyè ùdi kaaba aka anyi?

180 Mpindyewu nènwanbìlè cinùdi bènzè. Nudi bènzè cintu cyà citàmba kwenza bwôwa cinùkaadiku bènzè. S'kùdi bantu nkàmà yibidi anyi yisàtù kaaba aka bàvwà bàkèngela kwikalabò ku cyoshelu.

181 Lekèlaayi nnuleejèku, mu Dìnà dyà Mukalenge nè, ndi mubingè mu bìndi ngàmbe ebi. Tàngilàayi. Bàmwè bàà kunùdi nwènù bàdi kaaba aka, sambilaayi.

182 Mwab'ewu, inǎbǎnzà kampàndà nyèyè ewu musòmbe mwab'ewu mulwàte nkooci mutòòke, nkòlotò mukesè mutòòke, kacya ànu wàntàngila. Ncyèna mwà...Mmwena Kilistò. Kàdi ùdi munkaci mwà kusambila bwà butekète kampàndà. Ùdi nè binyòka. Udi witabuuja nè Nzambi ùdi mwà kukusàngaja, kukwondopa anyi? Dìbà adi udi mwà kucipeta.

183 Muntu udi ulonda, udi musòmbe ku luseke lwèbè aku awu, ùdi nè cintu kampàndà cìmutàcisha mu maci. Udi witabuuja nè Nzambi ùdi mwà kwondopa disaamà dyèbè dyà maci adi, mukalenge, nè kukusàngaja anyi? Eyowà. Elà cyanza cyèbè muulu pawikalà witabuuja.

Mpindyewu swâyikù nwikalèku nè kaneemu kààbûngi, katanci kakesè cyanaàna.

184 Muntu udi mumulondèle awu ùdi ùsaama disaamà dyà mwoyi. Udi witabuuja nè Nzambi ùdi mwà kukwondopa, mukalenge, nè disaamà dyà mwoyi adi anyi? Mèmè ncyèna mukumanyè to. Wèwè udi mwenyi kùndi. Ncyà bushùwà anyi? Wèwè udi mwenyi. Èè, tèèlejà. Bu Nzambi mwà kungambila nè wèwè udi nganyì, ncifwànyine kukwambulwisha anyi? Udi mwà kungumvwa bimpè anyi? Dìnà dyèbè m'Mukalenge Blackwood. Udi witabuuja nè Yèyè ùdi mwà kungambila kùdi mufùmìne anyi? Udi wa ku Riverbank, mu Californie. Aci ní ncyà bushùwà, juukilà kuulu. Ncitukù mwanji kumumòna to, kacya bàndela. Eyo.

185 Nzambi àkubènèshè, mukalenge. Diitabuuja dyèbè dyàkusàngaji. Inǎbǎnzà udi musòmbe ànu ku luseke lwèbè aku awu, ùdi nè disaamà dyà mutù mubindùlùke. Udi muswè kwondopiibwa ku dibinduluka dyèbè adi anyi? Elà cyanza cyèbè muulu, pawikalà muswè. Mutentèkèle cyanza cyèbè, mukalenge, bwà yèyè wàmòna mwà kwondopiibwa.

186 Inǎbǎnzà udi musòmbe ku luseke lwèbè awu, mpindyewu, ùdi nè disaamà dyà nsùkaadi, udi mulwàte nkanzu mukùnze awu. Mmuswè bàmusambidilà, yèyè pèndè. Nwamònu anyi? Mmuswè bwà bàmusambidilè. Ikàlà nè diitabuuja.

¹⁸⁷ Inābànzà nyèyè ewu musòmbè lwà paanyimà apa. Ūkaadi mudilongòlòle bwà dipandiibwa. Bu yèyè ànu mwà...Éyì Nzambi wa yààya! Ūdi nè matrice mapwekèlèle bikolè. Dìna dyèndè m'Mandāmwānzèlè Maxwell. Itàbùùjà. Juukilà kuulu, itàbà dyondopiibwa dyèbè, Mandāmwānzèlè Ma-...Kwèna nè kartà kàà disambila to, kí mmwómò anyi? Kwèna nè kartà kàà disambila anyi? Èyo, kwèna mene naakù dijinga to. Elà cyanza cyèbè muulu pìikalàbi nè ncyà bushùwà. Ncyèna mukumanyè to. Pìikalàbi nè ncyà bushùwà, nyungishà cyanza cyèbè. Katwèna bamanyàngàne to, nyungishà cyanza cyèbè mùshindù ewu.

Ncinyi cidiye mulenge's? Yèyè kí mmundengàku mèmè to.

¹⁸⁸ Mukalenge Stewart, udi pèèbè, muswe kwondopiibwa, ku dibìnduluka, nè kwitabuujà nè Nzambi neàkusàngàjè anyi? Ndi mwenyi kùdi. Kàdi ke cyùdi's, nè udi usaama dibìnduluka. Mbikolè bwà wèwè kudilama kaaba kàmwè. Juukilà kuulu witabè dyondopiibwa dyèbè, mu Dìna dyà Yesù Kilistò.

¹⁸⁹ Inābànzà nyèyè ewu musòmbè lwà paanyimà pèèbè apu. Ūdi pèndè, nè dibìnduluka. Ūdi nè cintu kampàndà cidi kaciyi cyènda bimpè to mu misunya yà mubidi wèndè amu. Yèyè neàcipangilè nè...Màdamù Newell, imàna kuulu, pìikalàdi ndìna dyèbè nè dyòdi diinè adi ke dyèbè. Itàbùùjà!

Udi witabuujà anyi?

¹⁹⁰ Bushùwà, inābànzà nyèyè ewu musòmbè kaaba aka mene, ùdi nè disaamà dyà mwoyi nè lwendu lwà mashi àya lubilu lukolè. Udi witabuujà aci anyi, mmwómò anyi, mwanèètù wa bakàji? Juukilà kuulu pìikalàci cyà bushùwà.

¹⁹¹ Inābànzà udi musòmbè ku luseke lwèbè aku awu, ùdi nè cintu kampàndà mu cyàdi cyèndè amu. Aci ní ncyà bushùwà, juukilà kuulu.

¹⁹² Ambilà inābànzà, udi ku luseke lwèndè awu, ùdi nè byùjà kwisù kwèndè, tuubyùjà tukesè bu nànkù. Pìikalàye muswè bwà kwondopiibwabi, mwambile imanyinè kuulu nè itabè.

¹⁹³ Mpindyewu kùdi musùmbà wà kunùdi mwab'ewu bàdi nè cyà kwikala ku cyoshelu, munkaci mwà kukèba Nyumà Mwimpè. Aci ng'EMU MMÙDÌ MUKALENGE WAMBÀ. Nudi bamòne cìndi njinga kwamba aci anyi? Bwà musangu ewu kàbidi nèngènzè dibìikila edi. S'ke dishindikà ndyòdi adi dyà nè ndi nnwàmbila bulelèlè. Nzambi ùdi munkaci mwà kwakula nè bantu kaaba aka, kàdi nudi nè mpatà ndambù. Udikù mwà kwikala nè meeji matòòke makùmbàne bwà kwela cyanza cyèbè muulu, kwamba nè: "Èyowà's, Mwanèètù Branham, mèmè ntu misangu yònsò ànu ntènkakana ndambù. Ndi muswè Nzambi wabúngi. Ndi mumanyè nè kùdi cintu kampàndà cìndi mupangile kaaba aka, nè cìvwà cikèngela bwà mèmè kwikala naaci pàmvwà njikula dibàtiiza dyà Nyumà Mwimpè apu"? Elà cyanza cyèbè muulu, udikù mwà kwenza nànkù anyi? Ikàlā wèwè

ànu nè meeji matòòke kùdi wêwè mwinè. Nyumà Mwîmpè kacya kàtu mupiile nànsha. Bwà cinyi kùyiku ulwa, dîbà adi, bwà kujikija mpatà ayi? Lwâkù's! "Mémè nêngeenzè lùkàsà . . ."

Akùlà, Mukalenge wanyì, akùlà, Mukalenge wanyì, (Ke cyôci aci's.)

Akùlà, nè mémè nêngiikalè nè lùkàsà bwà kuKwandamuna;

¹⁹⁴ Nwamònu's, ncyèna nnwàmbila cintu kampàndà cibì to, balundà bàanyi, n'Nyumà Mwîmpè munkaci mwà kubiikila, s'kùdi nkàmà mwab'ewu. Nwênù biitabùùje nè ndi mupròfetà, mpindyewu, vùlukàayi nè, ndi nnwàmbila, mu Dîna dyà Mukalenge nè: Nuvwa baseeswishiibwe! Lwâyaku!

. . . dikàlà dyà Kapyà òvwa dilenge mupròfetà, Dìmuvwija mukezùke ànu nè mwèndè mwònsò,

Pàakambà Dîyi dyà Nzambi nè: "Wâya kaaba kèètù nganyì?"

Pashiishe kwandamunayè nè: "Mfùmù, mmémè ewu, ntùmaaku."

¹⁹⁵ Kwênàku muswè kwamba cintu cìmwècìmwè aci anyi? Nànkù juukilà kuulu, elà byanza byèbè muulu.

Akùlà, Mukalenge wanyì, kaa, akùlà, Mukalenge wanyì,

Akùlà, nè mémè nêngiikalè lùkàsà bwà kuKwandamuna;

Akùlà, Mukalenge wanyì . . .

¹⁹⁶ CìdìYe munkaci mwà kwenza ncinyi? ÙMwandàmùnè dîbà adi, piikalàYe munkaci mwà kwakula. Piikalaku mpatà mikesè mwaba kampàndà, wêwè kùyi mutwishibwe mpindyewu bwà eci to, kùnàyikù nè mudilu to.

. . . "Mukalenge, ntùmaaku."

Kaa, akùlà, Mukalenge wanyì . . .

Yèyè ngudi wakula. Lwâkwaku.

. . . Mukalenge wanyì,

Akùlà, nè mémè nêngiikalè nè lùkàsà . . .

¹⁹⁷ Mpindyewu, balùmyàna, ncyèna nè meeji matùma ku dikolesha dyà maalu to. Ncitu nè meeji matùma ku dyamba dyà bintu bibi to. Ndi ndyùmvwa mulombòdibwe pândi ngàmba cîndi ngàmba aci.

. . . Mukalenge wanyì,

Akùlà, nè mémè nêngàdamunè . . .

¹⁹⁸ Wêwè udi wamba nè: "Bantu nebâmbè cinyi pa bwalu abu?" Ncidi Nzambi mwà kwamba pa bwalu abu, ke cyôci.

" . . . ntùmaaku."

Akùlà, Mukalenge wanyì, (Ncyà bushùwà.)

Akùlà, nè mèmè nēngiikalè nè lùkàsà bwà
kuKwandamuna;

... Mukalenge wanyì, kaa, akùlà, Mukalenge
wanyì,

Akùlà, nè mèmè nēngādamunè nè:
“Mukalenge, ntùmaaku.”

Kùdi miliyô mpindyewu mu mpèkaatù nè
bundù bàdi bàpùnga nè lufù,

Kaa, tèelejà mwadi wàbò wà dibungama nè
kànjaabàlà;

Kolèshàku, mwanètù, kolèshàku ùye
kabàsùngila;

Kaa, andàmùnàku nè lùkàsà lwònsò nè:
“Mfùmù, mmèmè ewu, ntùmaaku.”

Kaa, akùlà, wanyì. . .

¹⁹⁹ Mpindyewu muntu yònsò mwab’ewu, tуди baswè
kudìlongolola bwà mudimu munène wà dyondopa mààlabà,
kàbìdi. Nēnku ndi muswè bwà yònsò wa kunùdi nwēnù bāmbi
àseemenè pabwìpì nè bantu bàdi bàkèba Nyumà Mwímpè aba,
kanwimanyiki ànu mu tusunsa tùtaanu cyanààna to, shààlaayi
mwaba awu too nè. Too nè díbà kaayi? Too nè pààlwà Nyumà
Mwímpè.

... Mukalenge wanyì,

Kaa, akùlà, nè mèmè. . .

²⁰⁰ Mpindyewu batèeleji bàtentekelè muntu mukwàbò cyanza,
tentèkèlàngànaayi ànu cyanza muntu nè mukwèndè, pa muntu
kampàndà; nwēnù bìikalà mwà kusambila, bàdi bàleeja mpàlà
wa bantu bàdi kaaba aka aba.

... Mukalenge wanyì,

²⁰¹ Mpindyewu tujila ntupàte patapata, ku cyeshilu nkupàte
patapata, kùdi bantu batwè ku lukàmà nè makùmi àtaanu,
nkàmà yìbìdi.

... Mukalenge wanyì,

Akùlà, nè mèmè nēngādamunè. . .

²⁰² Mpindyewu bangàaku kusambila nè: “Mukalenge,
ntùmaaku! Akùlà, Mukalenge wanyì! Mukalenge, ntùmaaku!”

²⁰³ Ondòpàku aba nùnku, Mukalenge, mu Dìna dyà Yesù
Kilistò. Mukalenge, enzàku nànkù. Éyì Nzambi, andàmùnaaku
masambila à bóbò aba.

²⁰⁴ Kùlekediku to. Shààla wèwè ànu mwaba awu too nè
pènzekàci. Shààla wèwè ànu too nè pawatèeleja lubilà lwà
Nzambi. Shààla mwimàne too nè pààkunyùkusha Bakelùbà,
Nyumà Mwímpè mmwangate dikàlà dyà Kapyà ku cyoshelu cyà
Nzambi, ùDitèeka pa mishikù yèbè. . .? . . .

Akùlà, Mukalenge wanyì. . . 

64-0215 Bwenzeji
Elliott Auditorium
Tulare, Californie États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibanza cya luntandalà, kulamiibwa mu cikâlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bingà bintu bitudi naabi, anyisha webeje:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org